

後魏中印度三藏勒那摩提 譯

寶
性
論

佛陀教育基金會 印贈

一切佛經，及闡揚佛法諸書，無不令人趨吉避凶，改過遷善。明三世之因果，識本具之佛性。出生死之苦海，生極樂之蓮邦。讀者必須生感恩心，作難遭想。淨手潔案，主敬存誠。如面佛天，如臨師保。則無邊利益，自可親得。若肆無忌憚，任意褻瀆。及固執管見，妄生毀謗，則罪過彌天，苦報無盡。奉勸世人，當遠罪求益，離苦得樂也。





吳門張雨身敬書

究竟一乘寶性論卷第一

後魏中印度三藏勒那摩提譯

教化品第一

我今悉歸命 一切無上尊 爲開法王藏

廣利諸羣生 諸佛勝妙法 謗以爲非法

愚癡無智慧 迷於邪正故 具足智慧人

善分別邪正 如是作論者 不違於正法

順三乘菩提 對三界煩惱 雖是弟子造

正取邪則捨 善說名句義 初中後功德

智者聞是義 不取於餘法 如我知佛意

堅住深正義 如實修行者 同取於佛語

雖無善巧言 但有真實義 彼法應受持

如取金捨石 妙義如真金 巧語如瓦石

依名不依義 彼人無明盲 依自罪業障

謗諸佛妙法 如是之人等 則爲諸佛呵

或有取他心 謗諸佛妙法 如是之人等

則爲諸佛呵 爲種種供養 謗諸佛妙法

如是之人等 則爲諸佛呵 愚癡及我慢

樂行於小法 謗法及法師 則爲諸佛呵

外現威儀相 不識如來教 謗法及法師

則爲諸佛呵。爲求名聞故。起種種異說。
謗法及法師。則爲諸佛呵。說乖脩多羅。
言是眞實義。謗法及法師。則爲諸佛呵。
求利養攝衆。誑惑無智者。謗法及法師。
則爲諸佛呵。佛觀如是等。極惡罪衆生。
慈悲心自在。爲說法除苦。深智大慈悲。
能如是利益。我說不求利。爲正法久住。

佛寶品第二

佛體無前際。及無中間際。亦復無後際。
寂靜自覺知。既自覺知已。爲欲令他知。

是故爲彼說 無畏常恆道 佛能執持彼
智慧慈悲力 及妙金剛杵 割截諸苦芽
摧碎諸見山 覆藏顛倒意 及一切稠林
故我今敬禮

法寶品第三

非有亦非無 亦復非有無 亦非卽於彼
亦復不離彼 不可得思量 非聞慧境界
出離言語道 內心知清淨 彼真妙法日
清淨無塵垢 大智慧光明 普照諸世閒
能破諸翳障 覺觀貪瞋癡 一切煩惱等

故我今敬禮。

僧寶品第四

正覺正知者 見一切眾生 清淨無有我

寂靜真實際 以能知於彼 自性清淨心

見煩惱無實 故離諸煩惱 無障淨智者

如實見眾生 自性清淨性 佛法身境界

無礙淨智眼 見諸眾生性 徧無量境界

故我今敬禮。

問曰。依何等法有此三寶。答曰。偈言。

真如有雜垢 及遠離諸垢 佛無量功德

及佛所作業。如是妙境界。是諸佛所知。

依此妙法身。出生於三寶。

一切眾生有如來藏品第五

問曰云何得知一切眾生有如來藏答曰偈言。

一切眾生界。不離諸佛智。以彼淨無垢。

性體不二故。依一切諸佛。平等法性身。

知一切眾生。皆有如來藏。

又復略說偈言。

體及因果業。相應及以行。時差別徧處。

不變無差別。彼妙義次第。第一真法性。

我如是略說 汝今應善知。

此偈明何義偈言。

自性常不染 如寶空淨水 信法及般若

三昧大悲等 淨我樂常等 彼岸功德果

厭苦求涅槃 欲願等諸業 大海器寶水

無量不可盡 如燈明觸色 性功德如是

見實者說言 凡夫聖人佛 眾生如來藏

真如無差別 有不淨有淨 及以善淨等

如是次第說 眾生菩薩佛 如空徧一切

而空無分別 自性無垢心 亦徧無分別

如虛空徧至 體細塵不染 佛性徧眾生

諸煩惱不染 如一切世間 依虛空生滅

依於無漏界 有諸根生滅 火不燒虛空

若燒無是處 如是老病死 不能燒佛性

地依於水住 水復依於風 風依於虛空

空不依地等 如是陰界根 住煩惱業中

諸煩惱業等 住不善思惟 不善思惟行

住清淨心中 自性清淨心 不住彼諸法

陰入界如地 煩惱業如水 不正念如風

淨心界如空 依性起邪念 念起煩惱業

依因煩惱業	能起陰界入	依止於五陰
界入等諸法	有諸根生滅	如世界成壞
淨心如虛空	無因復無緣	及無和合義
亦無生住滅	如虛空淨心	常明無轉變
爲虛妄分別	客塵煩惱染	菩薩摩訶薩
如實知佛性	不生亦不滅	又無老病等
菩薩如是知	得離於生死	憐愍眾生故
示現有生滅	佛身不變異	以得無盡法
眾生所歸依	以無邊際故	常住不二法
以離妄分別	恆不執不作	清淨心力故

法身及如來 聖諦與涅槃 功德不相離
如光不離日。

無量煩惱所纏品第六

貧賤女泥模	煩惱垢相似	佛蜜實真金
皆有如來藏	華蜂糞糞穢	地果故弊衣
眾生貪瞋癡	妄想煩惱等	塵勞諸垢中
懷轉輪聖王	焦黑泥模中	有上妙寶像
朽故弊壞衣	纏裹真金像	貧賤醜陋女
糞穢中真金	地中珍寶藏	諸果子中芽
萎華中諸佛	眾蜂中美蜜	皮糞等中寶

寶牙金像王 上妙寶像等 如來藏相似。

問曰華佛譬喻爲明何義答曰言萎華者喻諸煩惱言諸佛者喻如來藏偈言。

功德莊嚴佛 住於萎華中 淨天眼者見

去華顯諸佛 佛眼觀自法 徧一切眾生

下至阿鼻獄 具足如來藏 自處常住際

以慈悲方便 令一切眾生 遠離諸障礙

如朽故華中 有諸佛如來 天眼者見知

除去萎華葉 如來亦如是 見貪煩惱垢

不淨眾生中 具足如來藏 以大慈悲心

憐愍世間故 爲一切眾生 除煩惱華葉
問曰蜂蜜譬喻爲明何義答曰言羣蜂者喻諸煩惱
言美蜜者喻如來藏偈言

上妙美味蜜	爲羣蜂圍繞	須者設方便
散蜂而取蜜	如來亦如是	以一切智眼
見諸煩惱蜂	圍繞佛性蜜	以大方便力
散彼煩惱蜂	顯出如來藏	如取蜜受用
猶如百千億	那由他諸蟲	遮障微妙蜜
無有能近者	有智者須蜜	殺害彼諸蟲
取上味美蜜	隨意而受用	無漏智如蜜

在眾生身中 煩惱如毒蟲 如來所殺害。
問曰：糴實譬喻爲明何義？答曰：言皮糴者，喻諸煩惱。
言內實者，喻如來藏偈言。

穀實在糴中	無人能受用	時有須用者
方便除皮糴	佛見諸眾生	身有如來性
煩惱皮糴纏	不能作佛事	以善方便力
令三界眾生	除煩惱皮糴	隨意作佛事
如稻穀麥等	不離諸皮糴	內實未淨治
不任美食用	如是如來藏	不離煩惱糴
令一切眾生	煩惱所饑渴	佛自在法王

在眾生身中 能示以愛味 除彼饑渴苦

問曰糞金譬喻爲明何義答曰糞穢譬喻者諸煩惱相似真金譬喻者如來藏相似偈言

如人行遠路 遺金糞穢中 經百千歲住

如本不變異 淨天眼見已 徧告眾人言

此中有真金 汝可取受用 佛觀眾生性

沒煩惱糞中 爲欲拔濟彼 雨微妙法雨

如於不淨地 漏失真金寶 諸天眼了見

眾生不能知 諸天既見已 語眾悉令知

教除垢方便 得淨真金用 佛性金亦爾

墮煩惱穢中 如來觀察已 爲說清淨法
問曰地寶譬喻爲明何義答曰地譬喻者諸煩惱相
似寶藏譬喻者如來藏相似偈言

譬如貧人舍 地有珍寶藏 彼人不能知

寶又不能言 眾生亦如是 於自心舍中

有不可思議 無盡法寶藏 雖有此寶藏

不能自覺知 以不覺知故 受生死貧苦

譬如珍寶藏 在彼貧人宅 人不言我貧

寶不言我此 如是法寶藏 在眾生心中

眾生如貧人 佛性如寶藏 爲欲令眾生

得此珍寶故 彼諸佛如來 出現於世間

問曰果芽譬喻爲明何義答曰果皮譬喻者諸煩惱相似子芽譬喻者如來藏相似偈言

如種種果樹 子芽不朽壞 種地中水灌

生長成大樹 一切諸眾生 種種煩惱中

皆有如來性 無明皮所纏 種諸善根地

生彼菩提芽 次第漸增長 成如來樹王

依地水火風 空時日月緣 多羅等種內

出生大樹王 一切諸眾生 皆亦復如是

煩惱果皮內 有正覺子芽 依白淨等法

種種諸緣故 次第漸增長 成佛大法王。
問曰衣像譬喻爲明何義答曰弊衣譬喻者諸煩惱
相似金像譬喻者如來藏相似偈言。

弊衣纏金像 在於道路中 諸天爲人說

此中有金像 種種煩惱垢 纏裹如來藏

佛無障眼見 下至阿鼻獄 皆有如來身

爲令彼得故 廣設諸方便 說種種妙法

金像弊衣纏 墮在曠野路 有天眼者見

爲淨示眾人 眾生如來藏 煩惱爛衣纏

在世閒險道 而不自覺知 佛眼觀眾生

皆有如來藏 爲說種種法 令彼得解脫
問曰女王譬喻爲明何義答曰貧女譬喻者諸煩惱
相似歌羅邏四大中有轉輪王身喻者生死歌羅邏
藏中有如來藏轉輪王相似偈言

譬如孤獨女	住在貧窮舍	身懷轉輪王
而不自覺知	如彼貧窮舍	三有亦如是
懷胎女人者	喻不淨眾生	如彼藏中胎
眾生性亦爾	內有無垢性	名爲不孤獨
貧女垢衣纏	極醜陋受苦	處於孤獨舍
懷妊王重擔	如是諸煩惱	染汙眾生性

受無量苦惱。無有歸依處。實有歸依處。而無歸依心。不覺自身中。有如來藏故。問曰。模像譬喻爲明何義。答曰。泥模譬喻者。諸煩惱相似寶像譬喻者。如來藏相似偈言。

如人融真金。鑄在泥模中。外有焦黑泥。內有眞寶像。彼人量已冷。除去外泥障。開模令顯現。取內眞寶像。佛性常明淨。客垢所染汚。諸佛善觀察。除障令顯現。離垢明淨像。在於泥模中。鑄師知無熱。然後去泥障。如來亦如是。見眾生佛性。

儼然處煩惱 如像在模中 能以巧方便

善用說法椎 打破煩惱模 顯發如來藏

爲何義說品第七

問曰餘脩多羅中皆說一切空此中何故說有眞如

佛性偈言

處處經中說 內外一切空 有爲法如雲

及如夢幻等 此中何故說 一切諸眾生

皆有眞如性 而不說空寂

答曰偈言

以有怯弱心 輕慢諸眾生 執著虛妄法

謗眞如實性。計身有神我。爲令如是等
遠離五種過。故說有佛性。

身轉清淨成菩提品第八

淨得及遠離。自他利相應。依止深快大
如彼所爲義。

初說佛菩提及得菩提方便偈言。

向說佛法身。自性清淨體。爲諸煩惱垢
客塵所染汚。譬如虛空中。離垢淨日月
爲彼厚密雲。羅網之所覆。佛功德無垢
常恆及不變。不分別諸法。得無漏眞智。

次說無垢清淨體偈言。

如清淨池水 無有諸塵濁 種種雜華樹

周帀常圍繞 如月離羅睺 日無雲翳等

無垢功德具 顯現卽彼體 蜂王美味蜜

堅實淨真金 寶藏大果樹 無垢真金像

轉輪聖王身 妙寶如來像 如是等諸法

卽是如來身。

次說成就自利利他偈言。

無漏及徧至 不滅法與恆 清涼不變異

不退寂靜處 諸佛如來身 如虛空無相

爲諸勝智者 作六根境界 示現微妙色
出於妙音聲 令嗅佛戒香 與佛妙法味
使覺三昧觸 令知深妙法 細思惟稠林
佛離虛空相。

次說第一義相應偈言。

如空不思議 常恆及清涼 不變與寂靜
徧離諸分別 一切處不著 離礙麤澀觸
亦不可見取 佛淨心無垢。

次說佛法身偈言。

非初非中後 不破壞不二 遠離於三界。

無垢無分別 此甚深境界 非二乘所知

具勝三昧慧 如是人能見 出過於恆沙

不思議功德 唯如來成就 不與餘人共

如來妙色身 清淨無垢體 遠離諸煩惱

及一切習氣 種種勝妙法 光明以爲體

令眾生解脫 常無有休息 所作不思議

如摩尼寶王 能現種種形 而彼體非實

爲世間說法 示現寂靜處 教化使淳熟

授記令入道 如來鏡像身 而不離本體

猶如一切色 不離於虛空。

次說如來常住身偈言。

世尊體常住 以修無量因 眾生界不盡

慈悲心如意 智成就相應 法中得自在

降伏諸魔怨 體寂靜故常。

次說不可思議體偈言。

非言語所說 第一義諦攝 離諸覺觀地

無譬喻可說 最上勝妙法 不取有涅槃

非三乘所知 唯是佛境界。

如來功德品第九

自利亦利他 第一義諦身 依彼真諦身

有此世諦體。果遠離淳熟。此中具足有

六十四種法。諸功德差別。

略說偈言。

佛力金剛杵。破無智者障。如來無所畏

處眾如師子。如來不共法。清淨如虛空

如彼水中月。眾生二種見。

初說十力偈言。

處非處果報。業及於諸根。性信至處道

離垢諸禪定。憶念過去世。天眼寂靜智

如是等諸句。說名十種力。

如金剛杵者。偈言。

處非處業性 眾生諸信根 種種道修地

過宿命差別 天眼漏盡等 佛力金剛杵

能刺摧散斫 癡鎧山牆樹。

次說四無畏。偈言。

如實覺諸法 遮諸礙道障 說道得無漏

是四種無畏 於所知境界 畢竟知自他

自知教他知 此非遮障道 能證勝妙果

自得令他得 說自他利諦 是諸處無畏。

如師子王者。偈言。

譬如師子王 諸獸中自在 常在於山林

不怖畏諸獸 佛人王亦爾 處於諸羣眾

不畏及善住 堅固奮迅等

次說佛十八不共法偈言。

佛無過無諍 無妄念等失 無不定散心

無種種諸想 無作意護心 欲精進不退

念慧及解脫 知見等不退 諸業智爲本

知三世無障 佛十八功德 及餘不說者

佛身口無失 若他來破壞 內心無動相

非住心捨心 世尊欲精進 念淨智解脫

知見常不失 示現可知境 一切諸業等
智爲本展轉 三世無障礙 廣大智行常
是名如來體 大智慧相應 覺彼大菩提
最上勝妙法 爲一切眾生 轉於大法輪
無畏勝妙法 令彼得解脫。

次說虛空不相應義偈曰。

地水火風等 彼法空中無 諸色中亦無
虛空無礙法 諸佛無障礙 猶如虛空相
如來在世間 如地水火風 而諸佛如來
所有諸功德 乃至無一法 其餘世間有。

次說三十二大人相偈言

足下相平滿 具足千輻輪 跟臚趺上隆

伊尼鹿王躄 手足悉柔輓 諸指皆纖長

鵝王網縵指 臂肘上下臚 兩肩前後平

左右俱圓滿 立能手過膝 馬王陰藏相

身臚相洪雅 如尼拘樹王 體相七處滿

上半如師子 威德勢堅固 猶如那羅延

身色新淨妙 柔輓金色皮 淨輓細平密

一孔一毛生 毛柔輓上靡 微細輪右旋

身淨光圓而 頂上相高顯 項如孔雀王

頤方若師子。髮淨金精色。喻如因陀羅。

額上白毫相。通面淨光明。口含四十齒。

二牙白踰雪。深密內外明。上下齒平齊。

迦陵頻伽聲。妙音深遠聲。所食無完過。

得味中上味。細薄廣長舌。二目淳紺色。

眼睫若牛王。功德如蓮華。如是說人尊。

妙相三十二。一一不雜亂。普身不可嫌。

次說如水中月。偈言。

秋空無雲翳。月在天及水。一切世閒人。

皆見月勢力。清淨佛輪中。具功德勢力。

佛子見如來 功德身亦爾。

自然不休息佛業品第十

於可化眾生 以教化方便 起化眾生業

教化眾生界 諸佛自在人 於可化眾生

常待時待處 自然作佛事 徧覺知大乘

最妙功德聚 如大海水寶 如來智亦爾

菩提廣無邊 猶如虛空界 放無量功德

大智慧日光 徧照諸眾生 有佛妙法身

無垢功德藏 如我身無異 煩惱障智障

雲霧羅網覆 諸佛慈悲風 吹令散滅盡。

次說大乘業喻略說偈言

帝釋妙鼓雲 梵天日摩尼 響及虛空地

如來身亦爾

初說帝釋鏡像譬喻偈言

如彼毗瑠璃 清淨大地中 天主帝釋身

於中鏡像現 如是眾生心 清淨大地中

諸佛如來身 於中鏡像現 帝釋現不現

依地淨不淨 如是諸世間 鏡像現不現

如來有起滅 依濁不濁心 如是諸眾生

鏡像現不現 天主帝釋身 鏡像有生滅

不可得說有 不可得說無 如來身亦爾

鏡像有生滅 不可得說有 不可得說無

如地普周徧 遠離高下穢 大瑠璃明淨

離垢功德平 以彼毗瑠璃 清淨無垢故

天主鏡像現 及莊嚴具生 若男若女等

於中見天主 及妙莊嚴具 作生彼處願

眾生爲生彼 修行諸善行 持戒及布施

散華捨珍寶 後時功德盡 地滅彼亦滅

心瑠璃地淨 諸佛鏡像現 諸佛子菩薩

見佛心歡喜 爲求菩提故 起願修諸行

不生不滅者卽是如來偈言

如毗瑠璃滅 彼鏡像亦滅 無可化眾生

如來不出世 瑠璃寶地淨 示現佛妙像

彼淨心不壞 信根芽增長 白淨法生滅

佛像亦生滅 如來不生滅 猶如帝釋王

此業自然有 見是等現前 法身不生滅

盡諸際常住。

次說天中妙鼓譬喻偈言

天妙法鼓聲 依自業而有 諸佛說法音

眾生自業聞 如妙聲遠離 功用處身心

令一切諸天 離怖得寂靜。佛聲亦如是

離功用身心 令一切眾生 得證寂滅道。

於彼戰鬪時 爲破脩羅力 因鼓出畏聲

令脩羅退散。如來爲眾生 滅諸煩惱苦

爲世閒說法 示勝禪定道。

一切世閒人不覺自過失。偈言。

聾不聞細聲 天耳聞不徧 唯智者境界

以聞心不染。

次說雲雨譬喻偈言。

知有起悲心 徧滿世閒處 定持無垢藏

佛雨淨穀因，世閒依善業，依風生雲雨，
依悲等增長，佛妙法雲雨。

依止器世閒雨水味變壞傷言。

譬如虛空中，雨八功德水，到鹹等住處

生種種異味，如來慈悲雲，雨八聖道水

到眾生心處，生種種解味。

無差別心傷言。

信於妙大乘，及中謗法者，人遮多烏鬼

此三聚相似，正定聚眾生，習氣不定聚

身見邪定聚，邪見流生死，秋天無雲雨

人空鳥受苦 夏天多雨水 燒鬼令受苦

佛現世不現 悲雲雨法雨 信法器能得

謗法有不聞

不護眾生傷言

天雨如車軸 澍下衝大地 雹及霹靂石

金剛爆火等 不護微細蟲 山林諸果樹

草穀稻糧等 行人故不雨 如來亦如是

於麤細眾生 相應諸方便 般若悲雲雨

諸煩惱習氣 我邪見眾生 如是種種類

一切智不讓

爲滅苦火偈言。

知病離苦因 取無病修藥 苦因彼滅道

知離觸修等 無始世生死 彼流轉五道

五道中受樂 猶如臭爛糞 寒熱惱等觸

諸苦畢竟有 爲令彼除滅 降大妙法雨。

知天中退苦 人中追求苦 有智者不求

人天自在樂 慧者信佛語 已信者知苦

亦復知苦因 觀滅及知道

次說梵天譬喻偈言。

梵天過去願 依諸天淨業 梵天自然現

化佛身亦爾。梵宮中不動。常現於欲界。

諸天見妙色。失五欲境界。佛法身不動。

而常現世間。眾生見歡喜。不樂諸有樂。

有現不現。偈言。

從天退入胎。現生有父母。在家示嬰兒。

習學諸伎藝。戲樂及遊行。出家行苦行。

現就外道學。降伏於天魔。成佛轉法輪。

示道入涅槃。諸薄福眾生。不能見如來。

次說日譬喻。偈言。

如日光初出。普照諸蓮華。有同一時開。

亦有一時合 佛日亦如是 照一切眾生
有智如華開 有罪如華合 如日照水華
而日無分別 佛日亦如是 照而無分別
次第偈言

日初出世間 千光次第照 先照高大山
後照中下山 佛日亦如是 次第照世間
先照諸菩薩 後及餘眾生

光明輪不同偈言

色智身二法 大悲身如空 徧照諸世間
故佛不同日 日不能徧照 諸國土虛空

不破無明闇 不示何知境 放種種諸色

光明雲羅網 示大慈悲體 眞如妙境界

佛入城聚落 無眼者得眼 見佛得大利

亦滅諸惡法 無明沒諸有 邪見黑闇障

如來日光照 見慧未見處

次說摩尼珠譬喻偈言

一時同處住 滿足所求意 摩尼寶無心

而滿眾生願 自在大法王 同住於悲心

眾生種種聞 佛心無分別

次說響譬喻偈言

譬如諸響聲 依地而得起 自然無分別
非內非外住 如來聲亦爾 依他心而起
自然無分別 非內非外住

次說虛空譬喻偈言。

無物不可見 無觀無依止 過眼識境界
無色不可見 空中見高下 而空不如是
佛中見一切 其義亦如是。

次說地譬喻偈言。

一切諸草木 依止大地生 地無分別心
而增長成就 眾生心善根 依止佛地生

佛無分別心 而增廣成就 佛聲猶如響

以無名字說 佛身如虛空 徧不可見常

如依地諸法 一切諸妙藥 徧爲諸眾生

不限於一人 依佛地諸法 白淨妙法藥

徧爲諸眾生 不限於一人

校量信功德品第十一

佛性佛菩提 佛法及佛業 諸出世淨人

所不能思議 此諸佛境界 若有能信者

得無量功德 勝一切眾生 以求佛菩提

不思議果報 得無量功德 故勝諸世間

若有人能捨	摩尼諸珍寶	徧布十方界
無量佛國土	爲求佛菩提	施與諸法王
是人如是施	無量恆沙劫	若復有人聞
妙境界一句	聞已復能信	過施福無量
若有智慧人	奉持無上戒	身口意業淨
自然常護持	爲求佛菩提	如是無量劫
是人所得福	不可得思議	若復有人聞
妙境界一句	聞已復能信	過戒福無量
若人入禪定	焚三界煩惱	過天行彼岸
無菩提方便	若復有人聞	妙境界一句

聞已復能信。過禪福無量。無慧人能捨。

唯得富貴報。修持禁戒者。得生人天中。

修行斷諸障。非慧不能除。慧除煩惱障。

亦能除智障。聞法爲慧因。是故聞法勝。

何況聞法已。復能生信心。我此所說法。

爲自心清淨。依諸如來教。脩多羅相應。

若有智慧人。聞能信受者。我此所說法。

亦爲攝彼人。依燈電摩尼。日月等諸明。

一切有眼者。皆能見境界。依佛法光明。

慧眼者能見。以法有是利。故我說此法。

若一切所說 有義有法句 能令修行者
遠離於三界 及示寂靜法 最勝無上道
佛說是正經 餘者顛倒說 雖說法句義
斷三界煩惱 無明覆慧眼 貪等垢所纏
又於佛法中 取少分說者 世典善言說
彼三尙可受 何況諸如來 遠離煩惱垢
無漏智慧人 所說脩多羅 以離於諸佛
一切世閒中 更無勝智慧 如實知法者
如來說了義 彼不可思議 思者是謗法
不識佛意故 謗聖及壞法 此諸邪思惟

煩惱愚癡人 妄見所計故 故不應執著

邪見諸垢法 以淨衣受色 垢膩不可染

問曰。以何因緣有此謗法。答曰。偈言。

愚不信白法 邪見及憍慢 過去謗法障

執著不了義 著供養恭敬 唯見於邪法

遠離善知識 親近謗法者 樂著小乘法

如是等眾生 不信於大乘 故謗諸佛法

智者不應畏 怨家蛇火毒 因陀羅霹靂

刀杖諸惡獸 師子虎狼等 彼但能斷命

不能令人入 可畏阿鼻獄 應畏謗深法

及謗法知識 決定令人入 可畏阿鼻獄
雖近惡知識 惡心出佛血 及殺害父母
斷諸聖人命 破壞和合僧 及斷諸善根
以繫念正法 能解脫彼處 若復有餘人
誹謗甚深法 彼人無量劫 不可得解脫
若人令眾生 學信如是法 彼是我父母
亦是善知識 彼人是智者 以如來滅後
迴邪見顛倒 令人正道故 三寶清淨性
菩提功德業 我略說七種 與佛經相應
依此諸功德 願於命終時 見無量壽佛

無邊功德身。我及餘信者。既見彼佛已。

願得離垢眼。成無上菩提。

已說論本偈經竟。

究竟一乘寶性論卷第一

究竟一乘寶性論卷第二

後魏中印度三藏勒那摩提譯

此處應有教化品第一
一行宋元明麗本皆缺

論曰第一教化品如向偈中已說應知此論廣門
有十一品中則七品略唯一品初釋一品具攝此
論法義體相應知偈言

佛法僧寶性 菩提功德業 略說此論體

七種金剛句。

此偈明何義言金剛者猶如金剛難可沮壞所證
之義亦復如是故言金剛所言句者以此論句能

與證義爲根本故。此明何義。內身證法無言之體。以聞思智難可證得。猶如金剛。名字章句以能詮彼理中證智隨順正道能作根本故名爲句。此復何義有二義故。何謂二義。一者難證義。二者因義是名爲義。金剛字句應如是知。又何謂爲義。何謂爲字。義者則有七種證義。何謂七義。一者佛義。二者法義。三者僧義。四者眾生義。五者菩提義。六者功德義。七者業義。是名爲義。是故經言。又第一義諦者。所謂心緣尙不能知。何況名字章句。故所言字者。隨以何等名字章句。言語風聲能表能說能

明能示此七種義是名爲字。是故經言又世諦者。謂世閒中所用之事。名字章句言語所說故。又此七種金剛句義。如諸經中廣說應知。應云何知。依佛義故。如來經中告阿難言。阿難所言如來者。非可見法。是故眼識不能得見故。依法義故。如來經中告阿難言。阿難所言法者。非可說事。以是故。非耳識所聞故。依僧義故。如來經中告阿難言。阿難所言僧者。名爲無爲。是故不可身心供養禮拜讚歎。故依眾生義故。如來經中告舍利弗言。舍利弗。言眾生者。乃是諸佛如來境界。一切聲聞辟支佛。

等以正智慧不能觀察眾生之義何況能證毛道
凡夫於此義中唯信如來是故舍利弗隨如來信
此眾生義舍利弗言眾生者卽是第一義諦舍利
弗言第一義諦者卽是眾生界舍利弗言眾生界
者卽是如來藏舍利弗言如來藏者卽是法身故
依菩提義故經中說言世尊言阿耨多羅三藐三
菩提者名涅槃界世尊言涅槃界者卽是法身故
依功德義故如來經中告舍利弗言舍利弗如來
所說法身義者過於恆沙不離不脫不思議佛法
如來智慧功德舍利弗如世間燈明色及觸不離

不脫又如摩尼寶珠明色形相不離不脫舍利弗
法身之義亦復如是過於恆沙不離不脫不思議
佛法如來智慧功德故。依業義故如來經中告文
殊師利言。文殊師利如來不分別不分別無分別
而自然無分別。如所作業自然行故。如是等名略
說七種金剛字句總攝此論體相應知是故偈言
七種相次第 總持自在王 菩薩脩多羅
序分有三句。餘殘四句者 在菩薩如來
智慧差別分 應當如是知。

此偈明何義。以是七種金剛字句總攝此論一切

佛法廣說其相。如陀羅尼自在王經序分中三句。自餘四句在彼脩多羅菩薩如來法差別分應知。云何序分有初三句。彼脩多羅序分中言。婆伽婆平等證一切法善轉法輪善能教化調伏無量諸弟子眾。如是三種根本字句次第示現佛法僧寶說彼三寶次第生起成就應知。餘四句者說隨順三寶因成就三寶因應知。此明何義。以諸菩薩於八地中十自在爲首。具足得一切自在。是故菩薩坐於道場勝妙之處。於一切法中皆得自在。是故經言。婆伽婆平等證一切法故。以諸菩薩住九地。

時於一切法中得爲無上最大法師善知一切諸
眾生心到一切眾生根機第一彼岸能斷一切眾
生煩惱習氣是故菩薩成大菩提是故經言善轉
法輪故以諸菩薩於第十地中得住無上法王位
後能於一切佛所作業自然而行常不休息是故
經言善能教化調伏無量諸弟子眾故彼善能教
化調伏無量諸弟子眾卽彼經中次後示現是故
經言與大比丘眾俱如是乃至復有無量菩薩眾
俱如是次第善能教化聲聞位地及佛菩提善能
調伏一切煩惱如是畢竟有無量功德又說聲聞

菩薩諸功德已次說諸佛如來不可思議三昧境界又說諸佛如來三昧境界已次說無垢大寶莊嚴寶殿成就又說大寶莊嚴寶殿成就已次說大眾雲集種種供養讚歎如來兩種種衣兩種種華兩種種香如是等示現佛寶不思議事應知又復次說妙法莊嚴法座又說妙法莊嚴法座已次說法門名字及示現功德此明法寶功德差別應知又復次說諸菩薩摩訶薩迭共三昧行境界示現種種功德此明僧寶功德差別應知又復次說如來放大光明授諸菩薩摩訶薩太子法王位職又

復次說與大無畏不怯弱辯才又復讚歎諸佛如
來第一功德又復次說最上第一大乘之法示現
如實修行彼大乘故於法中證果卽彼三寶無上
功德次第差別序分中義大都已竟應如是知已
說自在王菩薩脩多羅序分中三寶次說佛性義
有六十種法清淨彼功德何以故以有彼清淨無
量功德性爲清淨彼性修六十種法爲此義故十
地經中數數說金以爲譬喻爲清淨彼佛性義故
又復卽於此陀羅尼自在王經中說如來業已次
說不清淨大毗瑠璃摩尼寶喻是故經言善男子

譬如善巧摩尼寶師善知清淨大摩尼寶。向大摩尼寶性山中取未清淨諸摩尼寶。既取彼寶以巖灰洗。巖灰洗已然後復持黑頭髮衣以用揩摩。不以爲足勤未休息。次以辛味飲食汁洗。食汁洗已然後復持衣纏裹木以用揩摩。不以爲足勤未休息。次後復以大藥汁洗。藥汁洗已次後復更持細軟衣以用揩摩。以細軟衣用揩摩已然後遠離銅鐵等鑛。毗瑠璃垢方得說言大瑠璃寶善男子。諸佛如來亦復如是。善知不淨諸眾生性。知已乃爲說無常苦無我不淨爲驚怖。彼樂世眾生令厭世。

閒入聲聞法中。而佛如來不以爲足。勤未休息。次爲說空無相無願。令彼眾生少解。如來所說法輪。而佛如來不以爲足。勤未休息。次復爲說不退法輪。次說清淨波羅蜜行。謂不見三事。令眾生入如來境界。如是依種種因。依種種性。入佛法中。入法中。已故名無上最大福田。又復依此自性清淨如來性。故經中偈言。譬如石鑛中真金。不可見。能清淨者。見見佛亦如是。向說佛性有六十種淨業功德。何謂六十。所謂四種菩薩莊嚴。八種菩薩光明。十六種菩薩摩訶薩大悲。三十二種諸菩薩業。已

說佛性義。次說佛菩提。有十六種無上菩提。大慈
悲心。已說佛菩提。次說諸佛如來功德。所謂十力
四無所畏。十八不共法。已說功德。次說如來三十
二種無上大業。如是七種金剛句義。彼脩多羅廣
說體相。如是應知。問曰。此七種句。有何次第。答曰。
偈言。

從佛次有法 次法復有僧 僧次無礙性

從性次有智 十力等功德 爲一切眾生

而作利益業 有如是次第。

已說一品具攝。此論法義體相。次說七品具攝。此

論法義體相解釋偈義應知

佛寶品第二

歸敬三寶者此明何義所有如來教化眾生彼諸
眾生歸依於佛尊敬如來歸依於法尊敬如來歸
依於僧依於三寶說十二偈初明佛寶故說四偈

佛體無前際

及無中間際

亦復無後際

寂靜自覺知

既自覺知已

爲欲令他知

是故爲彼說

無畏常恆道

佛能執持彼

智慧慈悲刀

及妙金剛杵

割截諸苦芽

摧碎諸見山

覆藏顛倒意

及一切稠林

寶性言卷二
一
故我今敬禮。

此偈示現何義偈言。

無爲體自然。不依他而知。智悲及以力。
自他利具足。

此偈略明佛寶所攝八種功德。何等爲八。一者無爲體二者自然三者不依他知四者智五者悲六者力七者自利益八者他利益。偈言。

非初非中後。自性無爲體。及法體寂靜。

故自然應知。唯內身自證。故不依他知。

如是三覺知。慈心爲說道。智悲及力等。

拔苦煩惱刺 初三句自利 後三句利他。

此偈明何義。遠離有爲名爲無爲。應知又有爲者。生住滅法。無彼有爲。是故佛體非初中後。故得名爲無爲。法身應知。偈言佛體無前際及無中間際。亦復無後際。故又復遠離一切戲論虛妄分別。寂靜體。故名爲自然。應知。偈言寂靜。故不依他。知者不依他。因緣證知。故不依他。因緣證知者。不依他。因緣生。故不依他。因緣生者。自覺不依他。覺。故如是。依於如來。無爲法身相。故一切佛事。無始世來。自然而行。常不休息。如是希有。不可思議。諸佛境界。

界不從他聞。不從他聞者。不從師聞。自自在智。無言之體。而自覺知。偈言。自覺知故。既自覺知。已然後。爲他生盲眾生。令得覺知。爲彼證得。無爲法身。說無上道。是故名爲無上智。悲應知。偈言。既自覺知。已爲欲令他知。是故爲彼說。無畏常恆道。故無畏常恆道者。明道無畏。是常是恆。以出世間不退轉法。如是次第。又拔他苦煩惱根本。如來智慧慈悲。及神力。如是三句。刀金剛杵。譬喻示現。又以何者。爲苦根本。略說言之。謂三有中。生名色。是又何者。爲煩惱根本。謂身見等。虛妄邪見。疑戒取等。又

名色者是彼所攝所生苦芽應知如來智慧慈悲
心等能割彼芽以是義故說刀譬喻偈言佛能執
持彼智慧慈悲刀故割截諸苦芽故又邪見疑所
攝煩惱見道遠離以世閒智所不能知稠林煩惱
不能破壞如世閒中樹林牆等彼相似法以如來
力能破壞彼以是故說金剛杵喻偈言及妙金剛
杵故摧碎諸見山覆藏顛倒意及一切稠林故此
六種句如來莊嚴智慧光明入一切佛境界經中
次第顯說應知應云何知彼經中言文殊師利如
來應正徧知不生不滅者此明如來無爲之相又

復次說無垢清淨瑠璃地中帝釋王身鏡像現等如是乃至九種譬喻皆明如來不生不滅又言文殊師利如來應正徧知清淨法身亦復如是不動不生心不戲論不分別無分別不思無思不思議無念寂滅寂靜不生不滅不可見不可聞不可躡不可嘗不可觸無諸相不可覺不可知如是等句皆說寂靜差別之相此明何義明佛一切所作事中遠離一切戲論分別寂靜自然次說餘殘脩多羅彼中說言如實覺知一切法門者此明如來不依他故證大菩提又復次說如來菩提有十六種

是故經言文殊師利如來如是如實覺知一切諸法觀察一切眾生法性不淨有垢有點奮迅於諸眾生大悲現前此明如來無上智悲應知。文殊師利如來如是如實覺知一切法者如向所說無體爲體如實覺知者如實無分別智知故觀察一切眾生法性者乃至邪聚眾生如我身中法性法體法界如來藏等彼諸眾生亦復如是無有差別如來智眼了了知故不淨者以諸凡夫煩惱障故有垢者以諸聲聞辟支佛等有智障故有點者以諸菩薩摩訶薩等依彼二種習氣障故奮迅者能如

實知種種眾生可化方便入彼眾生可化方便種種門故大悲者成大菩提得於一切眾生平等大慈悲心爲欲令彼一切眾生如佛證智如是覺知證大菩提故次於一切眾生平等轉大法輪常不休息如是三句能作他利益故名爲力應知又此六句次第初三種句謂無爲等功德如來法身相應示現自利益餘三種句所謂智等示現他利益又復有義以有智慧故證得第一寂靜法身是故名爲自利益又依慈悲力等二句轉大法輪示現他利益已說佛寶次明法寶

法寶品第三

論曰。依彼佛寶有眞法寶。以是義故。次佛寶後。示現法寶。依彼法寶。故說四偈。

非有亦非無

亦復非有無

亦非卽於彼

亦復不離彼

不可得思量

非聞慧境界

出離言語道

內心知清淨

彼眞妙法日

清淨無塵垢

大智慧光明

普照諸世間

能破諸翳障

覺觀貪瞋癡

一切煩惱等

故我今敬禮。

此偈示現何義。偈言

不思議不二。無分淨現對。依何得何法。

離法二諦相。

此偈略明法寶所攝八種功德何等爲八。一者不可思議二者不二三者無分別四者淨五者顯現六者對治七者離果八者離因離者偈言。

滅諦道諦等 二諦攝取離 彼各三功德

次第說應知。

此偈明何義前六功德中初三種功德不思議不二及無分別等示現彼滅諦攝取離煩惱應知餘殘有二句淨顯現對治示現彼道諦攝取斷煩惱

因應知。又證法所有離名爲滅諦。以何等法修行斷煩惱名爲道諦。以此二諦合爲淨法。以二諦相名爲離法。應知。偈言。

不思量無言 智者內智知 以如是義故
不可得思議 清涼不二法 及無分別法

淨顯現對治 三句猶如曰。

此偈明何義。略明滅諦有三種法。以是義故不可思議。應知。以何義故不可思議。有四義。故何等爲四。一者爲無。二者爲有。三者爲有無。四者爲二。偈言。非有亦非無。亦復非有無。亦非卽於彼。亦復不

離彼故滅諦有三種法應知者。此明何義滅諦非可知有三種法。何等爲三。一者非思量境界故。偈言不可得思量非聞慧境界故。二者遠離一切聲響名字章句言語相貌故。偈言出離言語道故。三者聖人內證法故。偈言內心知故。又滅諦云何不二法者及云何無分別者。如不增不減經中如來說言舍利弗。如來法身清涼以不二法故。以無分別法故。偈言清涼故。何者是二而說不二。所言二者謂業煩惱言分別者。所謂集起業煩惱因及邪念等。以知彼自性本來寂滅不二無二。行知苦本

來不生是名苦滅諦。非滅法故名苦滅諦。是故經
言文殊師利何等法中無心意意識行彼法中無
分別。以無分別故不起邪念。以有正念故不起無
明。以不起無明故即不起十二有支。以不起十二
有支故即名無生。是故聖者勝鬘經言世尊非滅
法故名苦滅諦。世尊所言苦滅者名無始無作無
起無盡離盡常恆清涼不變自性清淨離一切煩
惱藏所纏。世尊過於恆沙不離不脫不異不思議
佛法畢竟成就說如來法身。世尊如是如來法身
不離煩惱藏所纏。名如來藏。如是等勝鬘經中廣

說滅諦應知。又以何因得此滅諦。如來法身。謂於見道及修道中。無分別智三種。日相似相對法。應知。偈言。彼真妙法日故。何等爲三。一者日輪清淨。相似相對法。以遠離一切煩惱垢故。偈言。清淨無塵垢故。二者顯現一切色像。相似相對法。以一切種一切智能照知故。偈言。大智慧光明故。三者對治闇相似相對法。以起一切種智對治法故。偈言。普照諸世間故。又以何者是所治法。所謂依取不實事。相虛妄分別念。生貪瞋癡結。使煩惱。此明何義。愚癡凡夫。依結使煩惱。取不實事。相念。故起於貪。

心依瞋恚故起於瞋心。依於無明虛妄念故起於癡心。又復依彼貪瞋癡等虛妄分別取不實事相念起邪念心。依邪念心起於結使。依於結使起貪瞋癡。以是義故。身口意等造作貪業瞋業癡業。依此業故。復有生生不斷不絕。如是一切愚癡凡夫。依結使煩惱集起邪念。依邪念故起諸煩惱。依煩惱故起一切業。依業起生。如是此一切種諸煩惱染業。染生染愚癡。凡夫不如實知不如實見。一實性界。如彼如實性觀察如實性。而不取相。以不取相故。能見實性。如是實性諸佛如來平等證知。又

不見如是虛妄法相如實知見如實有法真如法
界以見第一義諦故如是二法不增不減是故名
爲平等證智是名一切種智所治障法應如是知
以起真如智對治法故彼所治法畢竟不復生起
現前偈言能破諸翳障覺觀貪瞋癡一切煩惱等
故又此得滅諦如來法身因於見道中及修道中
無分別智廣說如摩訶般若波羅蜜等脩多羅中
言須菩提真如如來真如平等無差別如是等應
知已說法寶次說僧寶。

僧寶品第四

論曰依大乘法寶有不退轉菩薩僧寶以是義故
次法寶後示現僧寶依彼僧寶故說四偈。

正覺正知者

見一切眾生

清淨無有我

寂靜真實際

以能知於彼

自性清淨心

見煩惱無實

故離諸煩惱

無障淨智者

如實見眾生

自性清淨性

佛法身境界

無礙淨智眼

見諸眾生性

徧無量境界

故我今敬禮。

此偈示現何義偈言。

如實知內身

以智見清淨

故名無上僧

諸佛如來說。

此偈明何義。偈言。

如實見眾生 寂靜眞法身 以見性本淨

煩惱本來無。

此偈明何義。以如實見本際以來。我空法空。應知
偈言。正覺正知者。見一切眾生清淨。無有我寂靜。
眞實際故。又彼如實知無始世來本際寂靜。無我
無法非滅煩惱。證時始有此明何義。此見自性清
淨法身。略說有二種法。何等爲二。一者見性本來
自性清淨。二者見諸煩惱本來寂滅。偈言。以能知

於彼自性清淨心見煩惱無實故離諸煩惱故。又
自性清淨心本來清淨又本來常爲煩惱所染此
二種法於彼無漏眞如法界中善心不善心俱更
無第三心如是義者難可覺知是故聖者勝鬘經
言世尊刹尼迦善心非煩惱所染刹尼迦不善心
亦非煩惱所染煩惱不觸心心不觸煩惱云何不
觸法而能得染心世尊然有煩惱有煩惱染心自
性清淨心而有染者難可了知如是等聖者勝鬘
經中廣說自性清淨心及煩惱所染應知又有二
種修行謂如實修行及徧修行難證知義如實修

行者謂見眾生自性清淨佛性境界故。偈言無障
淨智者如實見眾生自性清淨性佛法身境界故。
徧修行者謂徧十地一切境界故。見一切眾生有
一切智故。又徧一切境界者以徧一切境界依出
世閒慧見一切眾生乃至畜生有如來藏。應知彼
見一切眾生有真如佛性初地菩薩摩訶薩以徧
證一切真如法界故。偈言無礙淨智眼見諸眾生
性徧無量境界故。

如是內身自覺知彼無漏法界無障無礙。依於二
法一者如實修行二者徧修行。此明何義謂出世

閒如實內證眞如法智不共二乘凡夫人等應知
此明何義菩薩摩訶薩出世閒清淨證智略說有
二種勝聲聞辟支佛證智何等爲二。一者無障二
者無礙。無障者謂如實修行見諸眾生自性清淨
境界故名無障。無礙者謂徧修行以如實知無邊
境界故名無礙。此明何義偈言

如實知見道 見清淨佛智 故不退聖人
能作眾生依。

此偈明何義。又依初地菩薩摩訶薩證智清淨見
道不退地乘能作見彼無上菩提清淨勝因應知

偈言如實知見道見清淨佛智故。此初地證智勝
餘菩薩摩訶薩。布施持戒等波羅蜜功德。以是義
故菩薩摩訶薩。依如實見真如證智。是故能與一
切眾生天龍八部。聲聞辟支佛等。作歸依處。偈言
不退聖人能作眾生依故。

問曰。以何義故。不明歸依聲聞僧寶。答曰。菩薩僧
寶功德無量。是故應供。以應供故。合應禮拜讚歎
供養。聲聞之人。無如是義。以是義故。不明歸依聲
聞僧寶。此明何義偈言。

境界諸功德。證智及涅槃。諸地淨無垢。

滿足大慈悲。生於如來家。具足自在通。

果勝最無上。是勝歸依義。

此偈明何義略說菩薩十種勝義過諸聲聞辟支佛故何等爲十。一者觀勝二者功德勝三者證智勝四者涅槃勝五者地勝六者清淨勝七者平等心勝八者生勝九者神力勝十者果勝。觀勝者謂觀眞如境界是名觀勝。偈言境界故功德勝者菩薩修行無厭足不同二乘少欲等是名功德勝。偈言功德故證智勝者證二種無我是名證智勝。偈言證智故涅槃勝者教化眾生故是名涅槃勝。偈

言涅槃故。地勝者。所謂十地等。是名地勝。偈言。諸地故。清淨勝者。菩薩遠離智障。是名清淨勝。偈言。淨無垢故。平等心勝者。菩薩大悲徧覆。是名平等心勝。偈言。滿足大慈悲故。生勝者。諸菩薩生無生故。是名生勝。偈言。生於如來家故。神力勝者。謂三昧自在神通等力勝。是名神力勝。偈言。具足三昧自在通故。果勝者。究竟無上菩提故。是名果勝。偈言。果勝最無上故。此明何義。有點慧人知。諸菩薩功德無量。修習菩提無量。無邊廣大功德。有大智。慧慈悲圓滿。爲照知彼無量眾生。性行稠林。猶如。

初月唯除諸佛如來滿月菩薩摩訶薩知諸聲聞
乃至證得阿羅漢道少智慧人無大悲心爲照自
身猶如星宿。既如是知。欲取如來大滿月身。修菩
提道而當棄捨初月菩薩起心禮拜供養其餘星
宿聲聞辟支佛者。無有是處。此復何義。明爲利益
一切眾生。初始發起菩提之心。諸菩薩等。已能降
伏不爲利益他眾生身。爲自利益修持無漏清淨
禁戒。乃至證得阿羅漢果。聲聞之人。何況其餘得
十自在等無量無邊功德菩薩摩訶薩。而同聲聞
辟支佛等少功德人。無有是處。以是義故。經中偈

言若爲自身故修行於禁戒遠離大悲心捨破戒
眾生以爲自身故護持禁戒財如是持戒者佛說
非清淨若爲他人故修行於禁戒能利益眾生如
地水火風以爲他眾生起第一悲心是名淨持戒
餘似非清淨。

究竟一乘寶性論卷第二

究竟一乘寶性論卷第三

後魏中印度三藏勒那摩提譯

問曰依何等義爲何等人諸佛如來說此三寶答
曰偈言。

依能調所證。弟子爲二乘。信三供養等。
是故說三寶。

此偈明何義略說依三種義爲六種人故說三寶
何等爲三。一者調御師二者調御師法三者調御
師弟子偈言依能調所證弟子故六種人者何等
爲六。一者大乘二者中乘三者小乘四者信佛五

者信法六者信僧。偈言爲三乘故。信三供養等故。初釋第一義第一。第四人歸依兩足中最勝第一尊佛。示現調御師大丈夫義故。偈言依能調故。爲取佛菩提諸菩薩人故。偈言爲大乘故。爲信供養諸佛如來福田人故。偈言信佛供養故。以是義故。說立佛寶。偈言是故說佛寶故。已釋第一義第一。第四人次釋第二義第二。第五人歸依離煩惱中最勝第一法。示現調御師所證功德法故。偈言依所證故。爲自然知不依他知深因緣法。辟支佛人故。偈言爲中乘故。爲信供養第一妙法福田人故。

偈言信法供養故以是義故說立法寶。偈言是故
說法寶故已釋第二義第二第五次釋第三義
第三第六人歸依諸眾中最勝第一諸菩薩僧示
現調御師弟子於諸佛如來所說法中如實修行
不相違義故。偈言依弟子故爲從他聞聲聞人故
偈言爲小乘故爲信供養第一聖眾福田人故。偈
言信僧供養故以是義故說立僧寶。偈言是故說
僧寶故。是名略說依三種義爲六種人故。諸佛如
來說此三寶。偈言依能調所證弟子爲三乘信三
供養等是故說三寶故。

又爲可化眾生令次第入。以是義故。依於世諦。示現明說。立三歸依。此明何義偈言。

可捨及虛妄。無物及怖畏。一種法及僧
非究竟歸依。

此偈明何義。法有二種。何等爲二。一。所說法。二。所證法。所說法者。謂如來說脩多羅等名字章句。身所攝。故彼所說法。證道時滅。如捨船楫。偈言可捨。故所證法者。復有二種。謂依因果二種差別。以依何法證何法。故此明何義。所謂有道有爲相攝。若爲有爲相所攝者。彼法虛妄。偈言及虛妄。故若虛

妄者彼法非實。若非實者，彼非真諦。非真諦者，卽是無常。若無常者，非可歸依。又復若依彼聲聞道，所得滅諦，彼亦無物。猶如燈滅，唯斷少分諸煩惱。苦若如是者，則是無物。若無物者，云何爲他之所歸依。偈言：無物故，僧者凡有三乘人。三乘人中，依聲聞僧，常有怖畏。常求歸依諸佛如來，求離世間。此是學人所應作者。未究竟故，猶進趣向阿耨多羅三藐三菩提。故所言怖畏者，云何怖畏。以阿羅漢雖盡有漏而不斷一切煩惱習氣，彼於一切有爲行相，極怖畏。心常現在前，是故聖者勝鬘經言：

阿羅漢有恐怖。何以故。阿羅漢於一切無行怖畏。相住如人執劍欲來害己。是故阿羅漢無究竟樂。何以故。世尊依不求依。如眾生無依。彼彼恐怖。以恐怖故。則求歸依。如是阿羅漢有怖畏。以恐怖故。歸依如來。故彼若如是有怖畏。有彼人畢竟爲欲遠離彼怖畏處。求無畏處。以是義故。依遠離彼怖畏之處。名爲學者。當有所作。欲得阿耨多羅三藐三菩提。無畏之處。是故聲聞法僧二寶。是少分歸依。非究竟歸依。偈言二種法及僧。非究竟歸依。故此明何義。偈言。

眾生歸一處 佛法身彼岸 依佛身有法
依法究竟僧。

此偈明何義。如向所說諸佛如來不生不滅寂靜
不二離垢法身故。以唯一法身究竟清淨處故。又
三乘之人無有救者無歸依者。唯有彼岸無始本
際畢竟無盡。是可歸依。恆可歸依。所謂唯是諸佛
如來故。如是常恆清涼不變故。可歸依。聖者勝鬘
經中廣說應知。

問曰。以何義故。佛法眾僧說名爲寶。答曰。偈言。
眞寶世希有。明淨及勢力。能莊嚴世間。

最上。不變等。

此偈明何義。所言寶者有六種相似。依彼六種相似相對法。故佛法眾僧說名爲寶。何等爲六。一者世閒難得相似相對法。以無善根諸眾生等。百千萬劫不能得故。偈言眞寶世希有故。二者無垢相似相對法。以離一切有漏法故。偈言明淨故。三者威德相似相對法。以具足六通不可思議威德自在故。偈言勢力故。四者莊嚴世閒相似相對法。以能莊嚴出世閒故。偈言能莊嚴世閒故。五者勝妙相似相對法。以出世閒法故。偈言最上故。六者不

可改異相似相對法以得無漏法世間八法不能動故偈言不變故。

問曰依何等法有此三寶而依此法得有世間及出世間清淨生起三寶答曰爲彼義故說兩行偈。

眞如有雜垢

及遠離諸垢

佛無量功德

及佛所作業

如是妙境界

是諸佛所知

依此妙法身

出生於三寶

此偈示現何義偈言

如是三寶性

唯諸佛境界

以四法次第

不可思議故。

此偈明何義。眞如有雜垢者。謂眞如佛性未離諸煩惱所纏。如來藏故。及遠離諸垢者。卽彼如來藏轉身到佛地。得證法身。名如來法身故。佛無量功德者。卽彼轉身如來法身相中所有出世間十力無畏等一切諸功德。無量無邊故。及佛所作業者。卽彼十力等一切諸佛法。自然常作無上佛業。常不休息。常不捨離。常授諸菩薩記。彼處次第有四種法。不可思議。是故名爲如來境界。何等四處。偈言。

染淨相應處 不染而清淨 不相捨離法

自然無分別

此偈明何義真如有雜垢者同一時中有淨有染
此處不可思議不可思議者信染因緣法聲聞辟
支佛於彼非境界故是故聖者勝鬘經中佛告勝
鬘言天女自性清淨心而有染污難可了知有二
法難可了知謂自性清淨心難可了知彼心爲煩
惱所染亦難了知天女如此二法汝及成就大法
菩薩摩訶薩乃能聽受諸餘聲聞辟支佛等唯依
佛語信此二法故偈言染淨相應處故及遠離諸
垢者真如非本有染後時言清淨此處不可思議

是故經言心自性清淨自性清淨心本來清淨如
彼心本體如來如是知是故經言如來一念心相
應慧得阿耨多羅三藐三菩提故。偈言不染而清
淨故佛無量功德者。謂前際後際於一向染凡夫
地中常不捨離眞如法身。一切諸佛法無異無差
別。此處不可思議。是故經言復次佛子如來智慧
無處不至。何以故。以於一切眾生界中終無有一
眾生身中而不具足如來功德及智慧者。但眾生
顛倒不知如來智遠離顛倒起一切智無師智無
礙智佛子譬如有一極大經卷如一三千大千世

界大千世界一切所有無不記錄若與二千世界
等者悉記二千世界中事若與小千世界等者悉
記小千世界中事四天下等者悉記一切四天下
事須彌山王等者悉記須彌山王等事地天宮等
者悉記地天宮殿中事欲天宮等者悉記欲天宮
殿中事色天宮等者悉記色天宮殿中事若與無
色天宮等者悉記一切無色界天宮殿中事等彼
三千大千世界極大經卷在一極細小微塵內一
切微塵皆亦如是時有一人出興於世智慧聰達
具足成就清淨天眼見此經卷在微塵內作如是

念云何如此廣大經卷在微塵內而不饒益諸眾生耶我今應當勤作方便破彼微塵出此經卷饒益眾生作是念已爾時彼人卽作方便破壞微塵出此經卷饒益眾生佛子如來智慧無相智慧無礙智慧具足在於眾生身中但愚癡眾生顛倒想覆不知不見不生信心爾時如來以無障礙清淨天眼觀察一切諸眾生身旣觀察已作如是言奇哉奇哉云何如來具足智慧在於身中而不知見我當方便教彼眾生覺悟聖道悉令永離一切妄想顛倒垢縛令具足見如來智慧在其身內與佛

無異。如來卽時教彼眾生修八聖道捨離一切虛妄顛倒離顛倒已見如來智與如來等饒益眾生故。偈言不相捨離法故。及佛所作業者同一時一切處一切時自然無分別隨順眾生心隨順可化眾生根性不錯不謬隨順作佛業此處不可思議是故經言善男子如來爲令一切眾生入佛法中故無量如來業作有量說善男子如來所有實作業者於彼一切世閒眾生不可量不可數不可思議不可知不可以名字說何以故以難可得與前眾生故以於一切諸佛國土不休息故以一切諸

佛悉平等故以過一切諸世閒心所作事故以無分別猶如虛空悉平等故以無異無差別法性體故如是等廣說已又說不淨大毗瑠璃摩尼寶珠譬喻言善男子汝依此譬喻應知如來業不可思議故平等徧至故一切處不可呵故三世平等故不斷絕三寶種故諸佛如來雖如是住不可思議業中而不捨離虛空法身雖不捨離虛空法身而於眾生隨所應聞名字章句爲之說法雖爲眾生如是說法而常遠離一切眾生心所念觀何以故以如實知一切眾生諸心行故偈言自然無分別

故依此妙法身出生於三寶者偈言。

所覺菩提法 依菩提分知 菩提分教化

眾生覺菩提。 初句爲正因 餘三爲淨緣

前二自利益 後二利益他。

此偈明何義此四種句總攝一切所知境界。此明何義初一句者謂所證法應知以彼證法名爲菩提偈言所覺菩提法故第二句依菩提分知者以諸佛菩提功德能作佛菩提因故偈言依菩提分知故第三句菩提分教化者以菩提分令他覺故。第四句眾生覺菩提者所化眾生覺菩提故此四

種句次第不取相依此行故清淨菩提出生三寶
應知偈言所覺菩提法依菩提分知菩提分教化
眾生覺菩提故以一句因三句緣故如來得阿耨
多羅三藐三菩提以得菩提者十力等諸佛如來
法三十二種諸佛如來作業依如來業眾生聞聲
依彼法故得清淨因緣出生三寶應知是故偈言
初句爲正因餘三爲淨緣故。

一切眾生有如來藏品第五

論曰自此已後餘殘論偈次第依彼四句廣差別
說應知此以何義向前偈言眞如有雜垢及遠離

諸垢佛無量功德及佛所作業如是妙境界是諸佛所知依此妙法身出生於三寶此偈示現何義如向所說一切眾生有如來藏彼依何義故如是說偈言。

佛法身徧滿 眞如無差別 皆實有佛性
是故說常有

此偈明何義有三種義是故如來說一切時一切眾生有如來藏何等爲三。一者如來法身徧在一切諸眾生身。偈言佛法身徧滿故。二者如來眞如無差別。偈言眞如無差別故。三者一切眾生皆悉

實有眞如佛性。偈言皆實有佛性故。此三句義自

下論依如來藏脩多羅我後時說應知。如偈本言。

一切眾生界 不離諸佛智 以彼淨無垢

性體不二故。 依一切諸佛 平等法性身

知一切眾生 皆有如來藏。 體及因果業

相應及以行。 時差別。徧處。 不變無差別。

彼妙義次第 第一眞法性 我如是略說

汝今應善知。

此偈示現何義。略說此偈有十種義。依此十種說

第一義實智境界佛性差別。應知何等爲十一者。

體二者因三者果四者業五者相應六者行七者
時差別八者徧一切處九者不變十者無差別。
初依體因故說一偈。

自性常不染 如寶空淨水 信法及般若
三昧大悲等。

此初半偈示現何義偈言。

自在力不變 思實體柔軟 寶空水功德
相似相對法。

此偈明何義向說三種義彼三種義次第依於自
相同相如來法身三種清淨功德如如意寶珠虛

空淨水相似相對法應知此明何義。思者依如來法身所思所修皆悉成就。故後半偈者示現何義。偈言。

有四種障礙 謗法及著我 怖畏世間苦
捨離諸眾生。

此偈明何義。偈言。

聞提及外道 聲聞及自覺 信等四種法
清淨因應知。

此偈明何義。略說一切眾生界中有三種眾生。何等爲三。一者求有二者遠離。求有三者不求。彼二。

求有有二種何等爲二。一者謗解脫道無涅槃性常求住世間不求證涅槃。二者於佛法中闡提同位以謗大乘故是故不增不減經言舍利弗若有比丘比丘尼優婆塞優婆夷若起一見若起二見諸佛如來非彼世尊如是等人非我弟子舍利弗是人以起二見因緣從闡入闡從冥入冥我說是等名一闡提故偈言謗法故闡提故遠離求有者亦有二種何等爲二。一者無求道方便二者有求道方便無求道方便者亦有二種何等爲二。一者多種外道種種邪計謂僧佉衛世師尼健陀若提

子等無求道方便。二者於佛法中同外道行。雖信佛法而顛倒取彼何者。是謂犢子等見身中有我等不信第一義諦。不信眞如法空。佛說彼人無異外道。復有計空爲有。以我相憍慢故。何以故。以如來爲說空解脫門。令得覺知。而彼人計唯空無實。爲彼人故。寶積經中佛告迦葉。寧見計我如須彌山。而不用見。見憍慢眾生。計空爲有。迦葉。一切邪見解空得離。若見空爲有。彼不可化。令離世間。故偈言及著我故。及外道故。有方便求道者。亦有二種。何等爲二。一者聲聞。偈言怖畏世間苦。故聲聞故。

二者辟支佛偈言捨離諸眾生故及自覺故不求
彼二者所謂第一利根眾生諸菩薩摩訶薩何以
故以諸菩薩不求彼有如一闍提故又亦不同無
方便求道種種外道等故又亦不同有方便求道
聲聞辟支佛等故何以故以諸菩薩見世間涅槃
道平等故以不住涅槃心故以世間法不能染故
而修行世間行堅固慈悲涅槃心故以善住根本
清淨法中故又彼求有眾生一闍提人及佛法中
同闍提位名爲邪定聚眾生又遠離求有眾生中
墮無方便求道眾生名爲不定聚眾生又遠離求

有眾生中求離世閒方便求道聲聞辟支佛及不求彼二平等道智菩薩摩訶薩名爲正定聚眾生。又除求於無障礙道大乘眾生餘有四種眾生。何等爲四。一者闡提二者外道三者聲聞四者辟支佛。彼四眾生有四種障故不能證故不能會故不能見如來之性。何等爲四。一者謗大乘法一闡提障。此障對治謂諸菩薩摩訶薩信大乘法故。偈言信法故。二者橫計身中有我諸外道障。此障對治謂諸菩薩摩訶薩修行般若波羅蜜故。偈言及般若故。三者怖畏世閒諸苦聲聞人障。此障對治謂

諸菩薩摩訶薩修行虛空藏首楞嚴等諸三昧故。偈言三昧故。四者背捨利益一切眾生捨大悲心。辟支佛障。此障對治謂諸菩薩摩訶薩修行大悲爲利益眾生故。偈言大悲故。是名四種障障四種眾生爲對治彼四種障故。諸菩薩摩訶薩信修大乘等四種對治法得無上清淨法身到第一彼岸。何以故依此四種清淨法界修習善法。此是諸佛隨順法子於佛家生。是故偈言大乘信爲子。般若以爲母。禪胎大悲乳。諸佛如實子。偈言信等四種法清淨因應知故。

又依果業故說一偈。

淨我樂常等

彼岸功德果。

厭苦求涅槃

欲願等諸業。

此初半偈示現何義偈言。

略說四句義

四種顛倒法

於法身中倒

修行對治法。

此偈明何義彼信等四法如來法身因此能清淨彼向說四種法彼次第略說對治四顛倒如來法身四種功德波羅蜜果應知偈言略說四句義故此明何義謂於色等無常事中起於常想於苦法

中起於樂想於無我中起於我想於不淨中起於
淨想是等名爲四種顛倒應知偈言四種顛倒法
故爲對治此四種顛倒故有四種非顛倒法應知
何等爲四。謂於色等無常事中生無常想苦想無
我想不淨想等是名四種不顛倒對治應知。偈言
修行對治法故如是四種顛倒對治依如來法身
復是顛倒應知。偈言於法身中倒故對治此倒說
有四種如來法身功德波羅蜜果。何等爲四。所謂
常波羅蜜樂波羅蜜我波羅蜜淨波羅蜜應知。偈
言修行對治法故是故聖者勝鬘經言世尊凡夫

眾生於五陰法起顛倒想。謂無常常想。苦有樂想。無我我想。不淨淨想。世尊一切阿羅漢。辟支佛。空智者。於一切智境界。及如來法身。本所不見。若有眾生信佛語。故於如來法身起常想。樂想。我想。淨想。世尊。彼諸眾生。非顛倒見。是名正見。何以故。唯如來法身。是常。波羅蜜。樂。波羅蜜。我。波羅蜜。淨。波羅蜜。世尊。若有眾生於佛法身。作是見者。是名正見。世尊。正見者。是佛真子。從佛口生。從正法生。從法化生。得法餘財。如是等故。又此四種。如來法身功德。波羅蜜。從因向果。次第而說。淨我樂常。應知。

云何次第從因向果。謂誹謗大乘一闡提障實無有淨而心樂著取世間淨。此障對治謂諸菩薩摩訶薩信大乘修行證得第一淨波羅蜜果應知。於五陰中見有神我諸外道障實無神我而樂著取我。此障對治謂諸菩薩摩訶薩修行般若波羅蜜證得第一我波羅蜜果應知。此明何義一切外道執著色等非真實事以爲有我。而彼外道取著我相無如是我相虛妄顛倒一切時無我。以是義故說言如來如實智知一切法無我到第一彼岸而如來無彼我無我相何以故以一切時如實見知

不虛妄故非顛倒故。此以何義以卽無我名爲有我。卽無我者無彼外道虛妄神我。名有我者如來有彼得自在我。是故偈言。

如清淨眞空 得第一無我 諸佛得淨體
是名得大身。

此偈名何義。得大身者。謂如來得第一清淨眞如法身。彼是諸佛如來實我。以得自在體。以得第一清淨身。偈言諸佛得淨體故。以是義故。諸佛名得清淨自在。偈言是名得大身故。以是義故。依於此義。諸佛如來無漏界中得第一最自在我。又復卽

依如是義故如來法身不名爲有。以無我相無法相故。以是義故不得言有。以如彼相如是無故。又復卽依如是義故如來法身不名爲無。以唯有彼眞如我體是故不得言無法身。以如彼相。如有身故。依此義故。諸外道問如來死後爲有身耶。爲無身耶。有如是等是故如來不記不答。諸聲聞人畏世閒苦。爲對治彼畏世閒苦。諸菩薩摩訶薩修行一切世閒出世閒諸三昧。故證得第一樂波羅蜜。果應知。辟支佛人棄捨利益一切眾生樂住寂靜。爲對治彼棄捨眾生。諸菩薩摩訶薩修行大悲住。

無限齊世間常利益眾生證得第一常波羅蜜果
應知。是名諸菩薩摩訶薩信及般若三昧大悲四
種修行。如是次第得如來身淨我樂常四種功德
波羅蜜果應知。又復有義依此四種如來法身名
爲廣大如法界究竟如虛空盡未來際。此明何義
信修行大乘。是故諸佛如來常得清淨法界到第
一彼岸。是故說言廣大如法界。修行般若波羅蜜
是故諸佛如來成就虛空法身以器世間究竟無
我。以修行虛空藏等無量三昧。以是義故於一切
處一切法中皆得自在。是故說言究竟如虛空。以

修行大悲於一切眾生無限齊時得慈悲心平等。是故說言盡未來際。又此四種波羅蜜等住無漏界中。聲聞辟支佛得大力自在。菩薩爲證如來功德。法身第一。彼岸有四種障。何等爲四。一者緣相二者因相三者生相四者壞相。緣相者謂無明住地。卽此無明住地與行作緣。如無明緣行無明住地。緣亦如是。故因相者謂無明住地。緣行卽此無明住地。緣行爲因。如行緣識無漏業緣亦如是。故生相者謂無明住地。緣依無漏業因生三種意生身。如四種取緣依有漏業因而生三界三種意生

身生亦如是故。壞相者謂三種意生身緣不可思議變易死。如依生緣故有老死。三種意生身緣不可思議變易死亦如是故。又一切煩惱染皆依無明住地根本。以不離無明住地聲聞辟支佛大力菩薩未得遠離無明住地垢。是故未得究竟無爲淨波羅蜜。又卽依彼無明住地緣。以細相戲論習未得永滅。是故未得究竟無爲我波羅蜜。又卽緣彼無明住地有細相戲論集因。無漏業生於意陰未得永滅。是故未得究竟無爲樂波羅蜜。以諸煩惱染業染生染未得永滅。是故未證究竟甘露如

來法身以未遠離不可思議變易生死常未究竟
是故未得不變異體是故未得究竟無爲常波羅
蜜又如煩惱染無明住地亦如是如業染無漏業
行亦如是如生染三種意生身及不可思議變易
死亦如是如聖者勝鬘經言世尊譬如取緣有漏
業因而生三有如是世尊依無明住地緣無漏業
因生阿羅漢辟支佛大力菩薩三種意生身世尊
此三乘地三種意生身生及無漏業生依無明住
地有緣非無緣如是等勝鬘經中廣說應知復次
以聲聞辟支佛大力菩薩三種意生身中無淨我

樂常波羅蜜彼岸功德身是故聖者勝鬘經言唯
如來法身是常波羅蜜樂波羅蜜我波羅蜜淨波
羅蜜如是等故此明何義以如來法身自性清淨
離一切煩惱障智障習氣故名爲淨是故說言唯
如來法身是淨波羅蜜以得寂靜第一自在我故
離無我戲論究竟寂靜故名爲我是故說言唯如
來法身是我波羅蜜以得遠離意生陰身因故名
爲樂是故說言唯如來法身是樂波羅蜜以世間
涅槃平等證故故名爲常是故說言唯如來法身
是常波羅蜜又復略說有二種法依此二法如來

法身有淨波羅蜜應知何等爲二。一者本來自性清淨以因相故。二者離垢清淨以勝相故。有二種法依此二法如來法身有我波羅蜜應知何等爲二。一者遠離諸外道邊以離虛妄我戲論故。二者遠離諸聲聞邊以離無我戲論故。有二種法依此二法如來法身有樂波羅蜜應知何等爲二。一者遠離一切苦。二者遠離一切煩惱習氣。此以何義云何遠離一切苦以滅一切種苦故以滅一切意生身故。云何遠離煩惱習氣以證一切法故。有二種法依此二法如來法身有常波羅蜜應知何等

爲二。二者不滅一切諸有爲行以離斷見邊故。二者不取無爲涅槃以離常見邊故。以是義故聖者勝鬘經中說言世尊見諸行無常是斷見非正見見涅槃常是常見非正見。妄想見故作如是見故以是義故依如是向說法界法門第一義諦說卽世間法名爲涅槃。以此二法不分別故以證不住世間涅槃故。是故偈言無分別之人不分別世間不分別涅槃。涅槃有平等。後半偈者示現何義。偈言。

若無佛性者 不得厭諸苦 不求涅槃樂

亦不欲不願

以是義故。聖者勝鬘經言。世尊若無如來藏者。不得厭苦樂。求涅槃亦無欲涅槃。亦不願求。如是等。此明何義。略說佛性清淨正。因於不定。聚眾生能作二種業。何等爲二。一者依見世閒種種苦惱。厭諸苦。故生心欲離諸世閒中一切苦惱。偈言若無佛性者。不得厭諸苦。故二者依見涅槃樂。憇寂樂。故生求心。欲心願心。偈言若無佛性者。不求涅槃。樂亦不欲不願。故又欲者求涅槃。故求者憇涅槃。故憇者於憇求法中。不怯弱。故欲得者於所求法。

中方便追求故及諮問故願者所期法中所期法者心心相行是故偈言。

見苦果樂果 此依性而有 若無佛性者不起如是心。

此偈明何義凡所有見世閒苦果者凡所有見涅槃樂果者此二種法善根眾生有一切依因眞如佛性非離佛性無因緣故起如是心偈言見苦果樂果此依性而有故若無因緣生如是心者一闡提等無涅槃性應發菩提心偈言若無佛性者不起如是心故以性未離一切客塵煩惱諸垢於三

乘中未曾修習一乘信心又未親近善知識等亦
未修習親近善知識因緣是故華嚴經性起品言
次有乃至邪見聚等眾生身中皆有如來日輪光
照作彼眾生利益作未來因善根增長諸白法故
向說一闡提常不入涅槃無涅槃性者此義云何
爲欲示現謗大乘因故此明何義爲欲迴轉誹謗
大乘心不求大乘心故依無量時故如是說以彼
實有清淨性故不得說言彼常畢竟無清淨性。

究竟一乘寶性論卷第三

1111

1111

132

究竟一乘寶性論卷第四

後魏中印度三藏勒那摩提譯

又依相應義故說一偈

大海器寶水

無量不可盡

如燈明觸色

性功德如是

此初半偈示現何義偈言

佛法身慧定

悲攝眾生性

海珍寶水等

相似相對法

此偈明何義以有三處故次第有三種大海相似相對法於如來性中依因畢竟成就相應義應知。

何等三處。一者法身清淨因。二者集佛智因。三者得如來大悲因。法身清淨因者。信修行大乘器相似相對法。以彼無量不可盡故。偈言佛法身故海相似相對法。故集佛智因者。般若三昧珍寶相似相對法。偈言慧定故珍寶相似相對法。故得如來大悲因者。大悲心水相似相對法。偈言悲攝眾生性。故水相似相對法。故又修行智慧三昧門寶相似相對法。以彼無分別不可思議有大勢力功德相應故。又修行菩薩大悲水相似相對法。以於一切眾生柔軟大悲得一味等味相行故。如是彼

三種法。此三種因和合畢竟不相捨離。故名相應。後半偈者。示現何義。偈言。

通智及無垢。不離於真如。如燈明煖色。無垢界相似。

此偈明何義。有三處。次第三種燈相似相對法。於如來法界中。依果相應義。應知何等三處。一者通二者。知漏盡智三者。漏盡。此以何義通者。有五通光明相似相對法。以受用事能散滅彼。與智相違。所治闇法能治相似相對法。故偈言通。故明。故知漏盡智者。無漏智煖相似相對法。以能燒業煩惱。

無有餘殘。能燒相似相對法。故偈言智故煖。故漏盡者轉身漏盡。色相似相對法。以常無垢清淨光明具足。相無垢相似相對法。故偈言無垢。故色故。又無垢者以離煩惱障。故清淨者以離智障。故光明者如自性清淨體。彼二是客塵煩惱。如是略說六種無漏智。離煩惱無學身所攝法。於無漏法界中。彼此迭共不相捨離。不差別法界平等畢竟。名相應義應知。

又依行義。故說一偈。

見實者說言

凡夫聖人佛

眾生如來藏

眞如無差別。

此偈示現何義偈言。

凡夫心顛倒 見實異於彼 如實不顛倒

諸佛離戲論。

此偈明何義向明如來法界中一切法眞如清淨明同相依般若波羅蜜無分別智法門等爲諸菩薩摩訶薩說此以何義略明依三種人何等爲三一者不實見凡夫二者實見聖人三者畢竟成就如來法身是名三種行應知應云何知謂取顛倒離顛倒離戲論如是次第此以何義取顛倒者謂

諸凡夫三種虛妄想心見故。偈言凡夫心顛倒故。離顛倒者。以聖人遠離虛妄想心見故。偈言見實異於彼故。離戲論者。正離顛倒及諸戲論。以煩惱障智障及煩惱習氣諸佛如來根本永盡故。偈言如實不顛倒。諸佛離戲論故。

自此以下。即依此行。餘四種義。廣差別說。應知又復。即依彼三種人。依時差別。故說一偈。

有不淨有淨 及以善淨等 如是次第說
眾生菩薩佛。

此偈示現何義。偈言

體等六句義 略明法性體 次第三時中

說三種名字

此偈明何義。謂向所明無漏法性。如來廣說種種法門。彼諸法門。略說依於六種句義。所謂攝取體。因果業相應及行。偈言體等六句義。略明法性體。故於三時中。次第依彼三種名字。畢竟應知。偈言次第三時中。說三種名字。故此以何義。謂不淨時名爲眾生。偈言有不淨故。不淨淨時名爲菩薩。偈言有淨故。於善淨時名爲如來。偈言及以善淨故。以是義。故不增不減。經言舍利弗。卽此法身。過於

恆沙無量煩惱所纏。從無始來隨順世間生死濤
波去來生退名爲眾生。舍利弗卽此法身厭離世
間生死苦惱捨一切欲行十波羅蜜攝八萬四千
法門修菩提行名爲菩薩。舍利弗卽此法身得離
一切煩惱使纏過一切苦離一切煩惱垢得淨得
清淨得住彼岸清淨法中到一切眾生所觀之地
於一切境界中更無勝者。離一切障離一切礙於
一切法中得自在力名爲如來。應正徧知故偈言
如是次第說眾生菩薩佛故。

自此以下卽依彼三時明如來法性徧一切處故

說一偈。

如空徧一切

而空無分別

自性無垢心

亦徧無分別

此偈示現何義。偈言

過功德畢竟

徧至及同相

下中勝眾生

如虛空中色

此偈明何義。所有凡夫聖人諸佛如來自性清淨心平等無分別。彼清淨心於三時中次第於過失時於功德時於功德清淨畢竟時同相無差別。猶如虛空在瓦銀金三種器中平等無異無差別。一

切時有以是義故經中說有三時次第。如不增不減經言舍利弗不離眾生界有法身不離法身有眾生界眾生界卽法身法身卽眾生界舍利弗此二法者義一名異故。

自此以下卽依此三時明如來法性徧至一切處。依染淨時不變不異有十五偈。此等諸偈略說要義應知。偈言

諸過客塵來 性功德相應 眞法體不變
如本後亦爾。

此偈明何義偈言

十一偈及二 次第不淨時 煩惱客塵過
第十四十五 於善淨時中 過恆沙佛法
不離脫思議 佛自性功德 本際中間際
及以後際等 如來真如性 體不變不異
初依不淨時不變不異十一偈者

如虛空徧至

體細塵不染

佛性徧眾生

諸煩惱不染

如一切世間

依虛空生滅

依於無漏界

有諸根生滅

火不燒虛空

若燒無是處

如是老病死

不能燒佛性

地依於水住

水復依於風

風依於虛空

空不依地等

如是陰界根

住煩惱業中

諸煩惱業等

住不善思惟

不善思惟行

住清淨心中

自性清淨心

不住彼諸法

陰入界如地

煩惱業如水

不正念如風

淨心界如空

依性起邪念

念起煩惱業

依因煩惱業

能起陰入界

依止於五陰

界入等諸法

有諸根生滅

如世界成壞

淨心如虛空

無因復無緣

及無和合義

亦無生住滅

如虛空淨心

常明無轉變

爲虛妄分別

客塵煩惱染

此虛空譬喻偈示現何義明如來性依不淨時法
體不變偈言

不正思惟風 諸業煩惱水 自性心虛空

不爲彼二生 自性清淨心 其相如虛空

邪念思惟風 所不能散壞 諸業煩惱水

所不能溼爛 老病死熾火 所不能燒然。

此偈明何義如依邪念風輪起業煩惱水聚依業
煩惱水聚生陰界入世間而自性心虛空不生不
起偈言不正思惟風諸業煩惱水自性心虛空不
爲彼二生故如是依邪念風災業行煩惱水災老

病死等火災吹浸燒壞陰入界世間。而自性清淨心虛空常住不壞。如是於不淨時中器世間相似相對法諸煩惱染業染生染有集有滅。諸佛如來無爲之性猶如虛空不生不滅常不變易。示現法體此自性清淨法門虛空譬喻如陀羅尼自在王菩薩脩多羅中廣說應知。彼經中言諸善男子煩惱本無體真性本明淨。一切煩惱羸薄毗婆舍那有大勢力。一切煩惱客塵自性清淨心根本。一切諸煩惱虛妄分別自性清淨心如實不分別。諸佛子譬如大地依水而住。水依風住。風依空住。而彼

虛空無依住處。諸善男子如是四大地大水大風
大空大此四大中唯虛空大以爲最勝以爲大力
以爲堅固以爲不動以爲不作以爲不散不生不
滅自然而住。諸善男子彼三種大生滅相應無實
體性剎那不住。諸佛子此三種大變異無常。諸佛
子而虛空界常不變異。諸佛子如是陰界入依業
煩惱住。諸煩惱業依不正思惟住。不正思惟依於
佛性自性清淨心住。以是義故經中說言自性清
淨心客塵煩惱染。諸善男子所有邪念所有煩惱
業所有陰界入如是諸法從於因緣和合而生以

諸因緣壞散而滅。諸善男子。彼自性清淨心。無因無緣。故無和合。不生不滅。諸善男子。如虛空界。自性清淨心。亦復如是。如風大界。不正思惟。亦復如是。如水大海。諸業煩惱。亦復如是。如地大界。陰界入等。亦復如是。是故說言。一切諸法。皆無根本。皆無堅實。無住無住。本根本清淨。無根本故。已說不淨時中。依無分別相。自性清淨心。虛空界相似相對法。已說依不正念。諸業煩惱。因相水界相似相對法。已說依彼生陰界入果相。轉變地相似相對法。未說彼

焚燒死病老等諸過患相火相似相對法是故次
說偈言

有三火次第 劫燒人地獄 能作種種苦

能熟諸行根。

此偈明何義明此三法老病死火於不淨時中不
能變異彼如來藏是故聖者勝鬘經言世尊生死
者依世諦故說有生死世尊死者諸根壞世尊生
者新諸根起世尊而如來藏不生不死不老不變
何以故世尊如來藏者離有爲相境界世尊如來
藏者常恆清涼不變故。

已說依不淨時不變不異次說依淨不淨時不變不異故說二偈。

菩薩摩訶薩

如實知佛性

不生亦不滅

又無老病等

菩薩如是知

得離於生死

憐愍眾生故

示現有生滅

此偈示現何義偈言

老病死諸苦

聖人永滅盡

依業煩惱生

諸菩薩無彼

此偈明何義明此老病死等苦火於不淨時依業煩惱本生如世間火依薪本生以諸菩薩得生意

生身於淨不淨時畢竟永滅盡以是義故諸業煩惱等常不能燒然而依慈悲力故示現生老病死而遠離生等以見如實故以是義故諸菩薩摩訶薩依善根結使生非依業煩惱結使生以依心自在力生依大悲力現於三界示現生示現老示現病示現死而彼無有生老病死諸苦等法以如實見真如佛性不生不滅是名不淨淨時如脩多羅中依受無漏業根本煩惱廣說應知如如來於大海慧菩薩經中說言大海慧何者能住世間善根相應煩惱所謂集諸善根無有厭足故以心願生

攝取諸有故。求見一切諸佛如來故。教化一切眾生心不疲倦故。攝取一切諸佛妙法故。於諸眾生常作利益故。常不捨離樂貪諸法結使故。常不捨離諸波羅蜜結使故。大海慧是名諸菩薩摩訶薩。世間善根相應煩惱。依此煩惱諸菩薩摩訶薩。生於三界受種種苦。不爲三界煩惱過患之所染污。大海慧菩薩白佛言。世尊。此諸善根以何義故說名煩惱。佛告大海慧菩薩言。大海慧如是煩惱。諸菩薩摩訶薩能生三界受種種苦。依此煩惱故。有三界非染煩惱。三界中生大海慧菩薩以方便智。

力依善根力故心生三界是故名爲善根相應煩惱而生三界非染心生大海慧譬如長者若居士等唯有一子甚愛甚念見者歡喜而彼一子依愚癡心因戲樂故墮在極深糞廁井中時彼父母及諸親屬見彼一子墮在大廁深坑糞中見已歔歔悲泣啼哭而不能入彼極深廁糞屎器中而出其子爾時彼處眾中更有一長者子或一居士子見彼小兒墮在深廁糞屎井中見已疾疾生一子想生愛念心不起惡心卽入深廁糞屎井中出彼一子大海慧爲顯彼義說此譬喻大海慧何者彼義

大海慧言極深井糞屎坑者名爲三界大海慧言一子者一切眾生諸菩薩等於一切眾生一子想大海慧爾時父母及諸親者名爲聲聞辟支佛人以二乘人見諸眾生墮在世間極大深坑糞屎井中既見彼已悲泣啼哭而不能拔彼諸眾生大海慧彼時更有一長者子一居士子者名爲菩薩摩訶薩離諸煩惱清淨無垢以離垢心現見無爲眞如法界以自在心現生三界爲教化彼諸眾生故大海慧是名菩薩摩訶薩大悲畢竟遠離諸有畢竟遠離諸縛而迴生於三界有中以依方便般

若力故諸煩惱火不能焚燒欲令一切諸眾生等
遠離諸縛而爲說法。大海慧我今說此脩多羅句
依諸菩薩心爲利益一切眾生得自在力而生三
有。依諸善根慈悲心力依於方便般若力故是名
示現淨不淨時。又菩薩摩訶薩以如實智知如來
法身不生不滅故得如是菩薩摩訶薩功德法體。
此脩多羅句向前已說。自下此說大毗瑠璃摩尼
寶喻佛言大海慧譬如無價大毗瑠璃摩尼寶珠
善治善淨善光明墮在泥中住一千年彼摩尼寶
經千年後乃出彼泥出已水洗洗已極淨極淨洗

已然後極明。卽不失本清淨無垢摩尼寶體。大海
慧菩薩摩訶薩亦復如是。如實知見一切眾生自
性清淨光明淨心。而爲客塵煩惱所染。大海慧諸
菩薩等生如是心。彼諸煩惱不染眾生自性清淨
心。是諸煩惱客塵虛妄分別心起。而彼諸菩薩復
生是心。我今畢竟令諸眾生遠離客塵諸煩惱垢
爲之說法。如是菩薩不生怯弱心。轉於一切眾生
生增上力。我要畢竟令得解脫。菩薩爾時復生是
心。此諸煩惱無有少體。菩薩爾時復生是心。諸煩
惱無體。諸煩惱羸薄。是諸煩惱無有住處。如是菩

薩如實知諸煩惱虛妄分別而有依邪見念而有以正見者諸煩惱垢不能得起菩薩爾時復生是心我應如實觀諸煩惱更不復生以不生煩惱故生諸善法菩薩爾時復生是心我若自起諸煩惱者云何而得爲諸煩惱所縛眾生說法令離諸煩惱縛菩薩爾時復生是心以我不著諸煩惱故是故得爲諸煩惱縛眾生說法我應修行諸波羅蜜結使煩惱相應善根爲欲教化諸眾生故又復云何名爲世閒以三界相似鏡像法故此明何義依無漏法界中有三種意生身應知彼因無漏善根

所作名爲世閒。以離有漏諸業煩惱所作世閒法故亦名涅槃。依此義故聖者勝鬘經言世尊有有爲世閒有無爲世閒。世尊有有爲涅槃有無爲涅槃故。又有爲無爲心心數法相應法故說名爲淨不淨時。此義於第六菩薩現前地說。彼諸漏盡無障礙般若波羅蜜解脫現前修行大悲以爲救護一切眾生故不取證如寶鬘經中依漏盡故說入城喻。彼經中言善男子譬如有一城縱廣正等各一由旬多有諸門路險黑闇甚可怖畏有人入者多受安樂復有一人唯有一子愛念甚重遙聞彼

城如是快樂卽便捨子欲往入城是人方便得過
險道到彼城門一足已入一足未舉卽念其子尋
作是念我唯一子來時云何竟不與俱誰能養護
令離眾苦卽捨樂城還至子所善男子菩薩摩訶
薩亦復如是爲憐愍故修集五通旣修集已垂得
盡漏而不取證何以故愍眾生故捨漏盡通乃至
行於凡夫地中善男子城者喻於大般涅槃多諸
門者喻於八萬諸三昧門路險難者喻諸魔業到
城門者喻於五通一足入者喻於智慧一足未入
者喻諸菩薩未證解脫言一子者喻於五道一切

眾生顧念子者喻大悲心遺子所者喻調眾生能
得解脫而不證者卽是方便善男子菩薩摩訶薩
大慈大悲不可思議如是善男子菩薩摩訶薩大
方便力發大精進起堅固心修行禪定得證五通
如是菩薩依禪通業善修心淨無漏滅盡定現前
如是菩薩卽得生於大悲之心爲救一切諸眾生
故現前無漏智通而迴轉不取寂滅涅槃以爲攷
化諸眾生故迴取世間乃至示現凡夫人地於第
四菩薩燄地中爲自利益善起精進爲利益他善
取堅固心漏盡現前於第五菩薩難勝地中依止

五通自利利他善熟心行無漏滅盡定現前是故
於第六菩薩地中無障礙般若波羅蜜起漏盡現
前是故於第六菩薩現前地中得漏盡自在說名
清淨。是菩薩如是自身正修行教化眾生令置彼
處得大慈悲心於顛倒眾生救護心不著寂滅
涅槃善作彼方便。現前世間門爲眾生故。現前涅
槃門爲菩提分滿足故。修行四禪迴生欲界以爲
利益地獄畜生餓鬼凡夫種種眾生示現諸身已
得自在故。

已說依不淨淨時不變不異。次說依善淨時不變

不異故說二偈。

佛身不變異

以得無盡法

眾生所歸依

以無邊際故

常住不二法

以離妄分別

恆不執不作

清淨心力故。

此偈示現何義。偈言

不生及不死

不病亦不老

以常恆清涼

及不變等故。

此偈明何義。偈言

以常故不生

離意生身故

以恆故不死

離不思議退。

清涼故不病

無煩惱習故

不變故不老 無無漏行故。

此偈明何義明如來性於佛地時無垢清淨光明常住自性清淨以本際來常故不生以離意生身故以未來際恆故不死以離不可思議變易死故以本後際來清涼故不病以離無明住地所攝故若如是者不墮三世彼則不變是故不老以離無漏業迴轉故又復偈言

有二復有二 復有二二句 次第如常等
無漏境界中。

此偈明何義常恆清涼及不變等此四種句於無

漏法界中次第一一句。二二本之二釋義差別。如不增不減脩多羅中說言舍利弗如來法身常以不異法故以不盡法故。舍利弗如來法身恆以常可歸依故以未來際平等故。舍利弗如來法身清涼以不二法故以無分別法故。舍利弗如來法身不變以非滅法故以非作法故。

已說不變異。次說無差別。無差別者。卽依此善淨時本際以來畢竟究竟自體相善淨如來藏無差別故說一偈。

法身及如來

聖諦與涅槃

功德不相離

如光不離日。

此初半偈示現何義。偈言

略明法身等 體一而名異 依無漏界中

四種義差別。

此偈明何義。略說於無漏法界中。依如來藏有四種義。依四種義。有四種名。應知何等四義。偈言

佛法不相離 及彼真如性 法體不虛妄

自性本來淨。

此偈明何義。佛法不相離者。依此義。故聖者勝鬘經言。世尊不空如來藏。過於恆沙。不離不脫。不思

議佛法故。及彼眞如性者。依此義故。六根聚經言。世尊六根如是從無始來。畢竟究竟諸法體故。法體不虛妄者。依此義故。經中說言。世尊又第一義諦者。謂不虛妄涅槃是也。何以故。世尊彼性本際來常以法體不變故。自性本來淨者。依此義故。經中佛告文殊師利。如來應正徧知本際以來入涅槃故。又復依此四義次第。有四種名。何等爲四。一者法身二者如來三者第一義諦四者涅槃。以是義故。不增不減。經言舍利弗。言如來藏者。卽是法身故。又復聖者勝鬘經言。世尊不離法身有如來。

藏世尊不離如來藏有法身世尊依一苦滅諦說
名如來藏世尊如是說如來法身無量無邊功德
世尊言涅槃者卽是如來法身故後半偈者示現
何義偈言

覺一切種智 離一切習氣 佛及涅槃體

不離第一義

此四種名於如來法身無漏界中一味一義不相
捨離是故雖復有四種名而彼四義不離一法門
不離一法體此以何義所證一切法覺一切智及
離一切智障煩惱障習氣此二種法於無漏法界

中不異不差別不斷不相離。以是義故大般涅槃經中偈言無量種功德一切不思議不差別解脫解脫卽如來。以是義故聖者勝鬘經言世尊言聲聞辟支佛得涅槃者是佛方便故。此明何義言聲聞辟支佛有涅槃者。此是諸佛如來方便。見諸眾生於長道曠野遠行疲倦恐有退轉爲止息故造作化城。如來如是於一切法中得大自在。大方便故。明如是義。世尊如來應正徧知證平等涅槃一切功德無量無邊不可思議清淨畢竟究竟。此明何義。依四種義畢竟功德諸佛如來無差別。涅槃

相無上果中佛及涅槃一切功德不相捨離。若離佛地果中證智更無餘人有涅槃法。示現如是義依一切種智於諸佛如來無漏法界中譬喻示現。此明何義。寶鬘經中畫師譬喻示現具足一切功德。應知偈言。

如種種畫師	所知各差別	彼一人知分
第二人不知	有自在國王	勅諸畫師言
於彼標畫處	具足作我身	國中諸畫師
一切皆下手	若不闕一人	乃成國王像
畫師受勅已	畫作國王像	彼諸畫師中

一人行不在 由無彼一人 國王像不成

以其不滿足 一切身分故 所言畫師者

喻檀戒等行 言國王像者 示一切種智

一人不在者 示現少一行 王像不成者

空智不具足。

此偈明何義。以是義故寶鬘經言善男子諦聽諦聽我今爲汝說此譬喻。善男子譬如三千大千世界所有眾生悉善知畫。其中或有善能泥塗或能磨彩或曉畫身不曉手足或曉手足不曉面目時有國王以一張疊與是諸人而告之言凡能畫者

皆悉聚集於此。疊上畫吾身像。爾時諸人悉來集。聚隨其所能而共作之。有一畫師以緣事故竟不得來。諸人畫已持其上。王善男子可言諸人悉集作不不也。世尊善男子。我說此喻其義未顯。善男子一人不來故不得言一切集。作亦不得言像已成就。佛法行者亦復如是。若有一行不成就者。則不名具足。如來正法是故要當具足。諸行名爲成就。無上菩提故。又此檀等諸波羅蜜。一一差別。唯是如來所知境界。如來知彼種種差別無量無邊。應知以彼算數自在力等不能思議故。以對治彼

慳等諸垢是故得成清淨檀等諸波羅蜜。又以修行一切種一切空智及種種三昧門。於第八菩薩不動地中不分別一切菩薩地無閒無隔自然依止道智修行得無生法忍成就具足如來無漏戒成就一切功德於第九菩薩善慧地中依阿僧祇三昧陀羅尼海門攝取無量無邊諸佛之法依止解一切眾生根智成就無量無邊功德空智得無生法忍於第十菩薩法雲地中依止一切如來現前空智智成就無量無邊功德。得無生空法忍。次後得諸三昧斷一切煩惱障智障依止諸解脫。

門智成就清淨彼岸功德具足得一切種一切空
智以如是等四種地智中非聲聞辟支佛地以彼
聲聞辟支佛等去之甚遠以是義故說彼四種成
就不差別涅槃界是故偈言

慧智及解脫 不離法界體 無差涅槃界

日相似相對。

此偈明何義以何等慧以何等智以何等解脫彼
三不離法界實體明彼四種功德成就無差別涅
槃界偈言無差別涅槃界故爲彼四種義次第故
有四種相似相對法應知何等爲四。一者佛法身

中依出世間無分別慧能破第一無明黑闇彼光明照相似相對法應知。偈言慧故日相似相對故。二者依智故得一切智智知一切種照一切事放光明羅網相似相對法應知。偈言智故日相似相對故。三者依止彼二自性清淨心解脫無垢離垢光明輪清淨相似相對法應知。偈言解脫故日相似相對法故。四者卽此三種不離法界不離實體不相捨離相似相對法應知。偈言不離法界體故。日相似相對故。是故偈言

不證諸佛身 涅槃不可得 如棄捨光明

日不可得見。

此偈明何義。以如向說無漏法界中無始世界來諸佛法身中無漏諸法一切功德不相捨離。以是義故遠離如來無障無礙法身智慧離一切障。涅槃體相不可得見。不可得證。如離日光。明無日輪。可見。以是義故。聖者勝鬘經言。法無優劣。故得涅槃。知諸法平等。智故得涅槃。平等智故得涅槃。平等解脫。故得涅槃。平等解脫。知見故得涅槃。是故世尊說涅槃界一味等味。謂明解脫一味故。

究竟一乘寶性論卷第四

究竟一乘寶性論卷第五

後魏中印度三藏勒那摩提譯

無量煩惱所纏品第六

論曰。偈言。

向說如來藏 十種義示現 次說煩惱纏

以九種譬喻。

此偈明何義。向依如來藏說無始世界來彼法恆
常住法體不轉變。明如來藏有十種義。自此以下
依無始世界來煩惱藏所纏說無始世界來自性
清淨心具足法身。以九種譬喻明如來藏過於恆

沙煩惱藏所纏。如脩多羅說應知。九種譬喻者。如偈說言。

萎華中諸佛

眾蜂中美蜜

皮糲等中實

糞穢中真金。

地中珍寶藏

諸果子中芽

朽故弊壞衣

纏裹真金像

貧賤醜陋女

懷轉輪聖王

焦黑泥模中

有上妙寶像

眾生貪瞋癡

妄想煩惱等

塵勞諸垢中

皆有如來藏。

此偈示現何義。自此以下依此略說四偈句義。餘殘譬喻五十四偈廣說應知。此四行偈總略說彼

廣偈中義應知。又依彼義略說二偈。

華蜂糞穢

地果故壞衣

貧賤女泥模

煩惱垢相似。

佛蜜實真金

寶芽金像王

上妙寶像等

如來藏相似。

此偈示現何義偈言。

華蜂等諸喻

明眾生身中

無始世界來

有諸煩惱垢。

佛蜜等諸喻

明眾生身中

無始來具足

自性無垢體。

又復略說此如來藏脩多羅中明一切眾生界從

無始世界來客塵煩惱染心從無始世界來淨妙

法身如來藏不相捨離。是故經言依自虛妄染心
眾生染依自性清淨心。眾生淨云何自心染依自
心染有九種喻。謂萎華等應知。偈言。

貪瞋癡相續。及結使熏習。見修道不淨。

及淨地有垢。萎華等諸喻。說九種相對。

無邊煩惱纏。故說差別相。

此偈明何義。略說有九種煩惱。於自性清淨如來
法身界中。如萎華等九種譬喻。於諸佛等常外客
相。諸煩惱垢亦復如是。於真如佛性常客塵相。何
等以爲九種煩惱。一者貪使煩惱。二者瞋使煩惱。

三者癡使煩惱。四者增上貪瞋癡結使煩惱。五者無明住地所攝煩惱。六者見道所斷煩惱。七者修道所斷煩惱。八者不淨地所攝煩惱。九者淨地所攝煩惱。此如是等九種煩惱。以彼九種譬喻。示現應知。此明何義。世間貪等眾生身中所攝煩惱。能作不動地業行緣。成就色界無色界果報。出世間智能斷。名爲貪瞋癡使煩惱。偈言貪瞋癡相續故。又增上貪瞋癡眾生身中所攝煩惱。能作福業罪業行緣。但能成就欲界果報。唯有不淨觀智能斷。名爲增上貪瞋癡等結使煩惱。偈言及結使故。又

阿羅漢身中所攝煩惱能作無漏諸業行緣能生無垢意生身果報唯如來菩提智能斷名爲無明住地所攝煩惱偈言熏習故又有二種學人何等爲二。一者凡夫二者聖人。凡夫身中所攝煩惱初出世閒心見出世閒法智能斷名爲見道所斷煩惱。偈言見道故。聖人身中所攝煩惱如先見出世閒法修道智能斷名爲修道所斷煩惱。偈言修道故。又不究竟菩薩謂從初地乃至七地所攝煩惱七住地中所對治法。八地已上三住地中修道智能斷名爲不淨地所攝煩惱。偈言不淨故。又畢竟

究竟菩薩身中所攝煩惱八地已上三地修道智
所對治法。金剛三昧智能斷。名爲勝地所攝煩惱
偈言及淨地有垢故。是名略說九種煩惱次第。萎
華等九種譬喻。我已廣說應知。又復卽此九種煩
惱依八萬四千眾生行故。有八萬四千煩惱差別。
如如來智無量無邊故。有如是無量無邊煩惱纏。
如來藏故。言無量煩惱藏所纏。如來藏是故偈言。
愚癡及羅漢 諸學及大智 次第四種垢
及一二復二。如是次第說 四凡一聖人
二學二大智 名爲不淨地。

此偈明何義此九種譬喻於無漏界中如是次第
四種譬喻及第五譬喻後時二二煩惱諸垢依煩
惱垢染故言不清淨。又復云何知此九種貪等煩
惱於萎華等九種譬喻相似相對。又云何知如來
藏於諸佛等九種譬喻相似相對。偈言。

依佛神力故 有彼眾妙華 初榮時則愛

後萎變不愛 如華依榮悴 有愛有不愛

貪煩惱亦爾 初樂後不樂 羣蜂爲成蜜

瞋心嚙諸華 瞋恚心起時 生種種苦惱

稻等內堅實 外爲皮糲覆 如是癡心纏

不見內堅實。猶如臭穢糞。智觀貪亦爾。
起欲心諸相。結使如穢糞。譬如彼地中。
種種珍寶藏。眾生無天眼。是故不能見。
如是自在智。爲無明地覆。眾生無智眼。
是故不能見。如子離皮糲。次第生芽等。
見道斷煩惱。次第生諸地。以害身見等。
攝取妙聖道。修道斷煩惱。故說弊壞衣。
七地中諸垢。猶如胎所纏。遠離胎藏智。
無分別淳熟。三地知諸垢。如泥模所泥。
大智諸菩薩。金剛定智斷。萎華至泥模。

如是九種喻 示貪瞋癡等 九種煩惱垢

垢中如來藏 佛等相對法 如是九種義

以三種體攝。

此偈明何義謂依法身自性清淨心如來藏等三種實體有諸佛等九種譬喻相似相對法應知。三種實體者。偈言。

法身及眞如 如來性實體 三種及一種
五種喻示現。

此偈明何義初三種喻示現如來法身應知。三種譬喻者所謂諸佛美蜜堅固示現法身。偈言法身

故一種譬喻者。所謂真金示現真如。偈言真如故。又何等爲五種譬喻。一者地藏二者樹三者金像。四者轉輪聖王五者寶像。能生三種佛身。示現如來性。偈言如來性故。又法身者。偈言。

法身有二種 清淨真法界 及依彼習氣
以深淺義說。

此偈明何義。諸佛如來有二種法身。何等爲二。一者寂靜法界身。以無分別智境界故。如是諸佛如來法身。唯自內身法界能證應知。偈言清淨真法界故。二者爲得彼因。謂彼寂靜法界說法依可化。

眾生說彼說法應知以依眞如法身有彼說法名
爲習氣偈言及依彼習氣故彼說法者復有二種
一細二麤細者所謂爲諸菩薩摩訶薩演說甚深
祕密法藏以依第一義諦說故麤者所謂種種脩
多羅祇夜和伽羅那伽陀憂陀那尼陀那等名字
章句種種差別以依世諦說故是故偈言。

以出世間法 世中無譬喻 是故依彼性

還說性譬喻。如美蜜一味 微細法亦爾

脩多羅等說 如種種異味。

此偈明何義諸佛美蜜及堅固等三種譬喻此明

如來眞如法身有二種義。一者徧覆一切眾生。二者徧身中有無有餘殘。示現一切眾生有如來藏。此以何義於眾生界中無有一眾生離如來法身。在於法身外離於如來智在如來智外。如種種色像不離虛空中。是故偈言。

譬如諸色像 不離於虛空 如是眾生身
不離諸佛智 以如是義故 說一切眾生
皆有如來藏 如虛空中色 以性不改變
體本來清淨 如眞金不變 故說眞如喻。
此偈明何義明彼眞如如來之性乃至邪聚眾生

身中自性清淨心無異無差別光明明了以離客塵諸煩惱故後時說言如來法身如是以一眞金譬喻依眞如無差別不離佛法身故說諸眾生皆有如來藏以自性清淨心雖言清淨而本來無二法故是故經中佛告文殊師利言文殊師利如來如實知見自身根本清淨智以依自身根本智故知諸眾生有清淨身文殊師利所謂如來自性清淨身乃至一切眾生自性清淨身此二法者無二無差別是故偈言。

一切諸眾生 平等如來藏 眞如清淨法

名爲如來體。依如是義故。說一切眾生

皆有如來藏。應當如是知。

又復偈言。

佛性有二種。一者如地藏。二者如樹果。

無始世界來。自性清淨心。修行無上道。

依二種佛性。得出三種身。依初譬喻故。

知有初法身。依第二譬喻。知有二佛身。

眞佛法身淨。猶如眞金像。以性不改變。

攝功德寶體。證大法王位。如轉輪聖王。

依止鏡像體。有化佛像現。

此偈明何義。餘五種譬喻。所謂藏樹金像轉輪聖王寶像譬喻。示現生彼三佛法身。以依自體性。如來之性。諸眾生藏。是故說言一切眾生有如來藏。此示何義。以諸佛如來有三種身得名義。故此五種喻能作三種佛法身。因以是義。故說如來性。因此以何義。此中明性義。以爲因義。以是義。故經中偈言。

無始世界性 作諸法依止 依性有諸道
及證涅槃果。

此偈明何義。無始世界性者。如經說言諸佛如來

依如來藏說諸眾生無始本際不可得知故所言
性者如聖者勝鬘經言世尊如來說如來藏者是
法界藏出世間法身藏出世間上上藏自性清淨
法身藏自性清淨如來藏故作諸法依止者如聖
者勝鬘經言世尊是故如來藏是依是持是住持
是建立世尊不離不離智不斷不脫不異無爲不
思議佛法世尊亦有斷脫異外離智有爲法亦依
亦持亦住持亦建立依如來藏故依性有諸道者
如聖者勝鬘經言世尊生死者依如來藏世尊有
如來藏故說生死是名善說故及證涅槃果者如

聖者勝鬘經言世尊依如來藏故有生死依如來藏故證涅槃。世尊若無如來藏者不得厭苦樂求涅槃不欲涅槃不願涅槃故。此明何義明如來藏究竟如來法身不差別。眞如體相畢竟定佛性體於一切時一切眾生身中皆無餘盡應知。此云何知依法相知。是故經言善男子此法性法體性自性常住如來出世若不出世自性清淨本來常住一切眾生有如來藏。此明何義。依法性依法體依法相應依法方便。此法爲如是爲不如是。不可思議。一切處依法依法量依法信得心淨得心定彼

不可分別爲實爲不實。唯依如來信。是故偈言。
唯依如來信。信於第一義。如無眼目者。
不能見日輪。

此偈明何義。略說一切眾生界中有四種眾生。不
識如來藏如生盲人。何等爲四。一者凡夫。二者聲
聞三者辟支佛。四者初發菩提心菩薩。如聖者勝
鬘經中說言。世尊如來藏者於身見眾生非其境
界。世尊如來藏者於取四顛倒眾生非其境界。世
尊如來藏者於散亂心失空眾生非其境界。故此
明何義。身見眾生者謂諸凡夫。以彼凡夫實無色

等五陰諸法而取以爲有我我所虛妄執著我我所慢於離身見等滅諦無漏性甘露之法信亦不能何況出世間一切智境界如來藏能證能解無有是處。又取四顛倒諸眾生者所謂聲聞辟支佛人以彼聲聞辟支佛等應修行如來藏常而不修行如來藏以爲常以顛倒取一切法無常修行如來藏無常樂無常修行以不知不覺故應修行如來藏無常樂而不修行如來藏以爲樂以顛倒取一切法皆苦修行如來藏苦樂苦修行以不知不覺故應修行如來藏我而不修行如來藏以爲我以顛

倒取一切法無我修行如來藏無我樂無我修行。以不知不覺故。應修行如來藏淨而不修行如來藏以爲淨。以顛倒取一切法不淨修行如來藏不淨樂不淨修行以不知不覺故。如是聲聞辟支佛等一切不能如實隨順法身修行以是義故。第一彼岸常樂我淨法非彼聲聞辟支佛等所知境界。如是樂顛倒無常苦無我不淨相等。彼如來藏非其境界。如是之義。大般涅槃脩多羅中池水譬喻。廣明此義。應知。彼經中言。迦葉譬如春時有諸人等在大池浴乘船遊戲。失琉璃寶沒深水中。是時

諸人悉共入水求覓是寶。競捉瓦石草木沙礫各各自謂得琉璃珠歡喜持出乃知非眞。是時寶珠猶在水中以珠力故水皆澄清。於是大眾乃見寶珠故在水下猶如仰觀虛空月形。是時眾中有一智人以方便力安徐入水卽便得珠。汝等比丘不應如是修集無常苦無我想不淨想等以爲眞實。如彼諸人各以瓦石草木沙礫而爲寶珠。汝等應當善學方便在在處處常修我想常樂淨想復應當知先所修集四法相貌悉是顛倒。欲得眞實修諸想者如彼智人巧出寶珠所謂我想常樂淨想

故又散亂心失空。眾生者謂初發心菩薩。離空如來藏義。以失變壞物修行。名爲空解脫門。此以何義初發心菩薩起。如是心實有法。斷滅後時得涅槃。如是菩薩失空。如來藏修行。又復有人以空爲有物。我應得空。又生如是心。離色等法。別更有空。我應修行。令得彼空。彼人不知空。以何等法是如來藏。偈言。

不空如來藏

謂無上佛法

不相捨離相

不增減一法

如來無爲身

自性本來淨

客塵虛妄染

本來自性空

此偈明何義。不減一法者。不減煩惱。不增一法者。眞如性中。不增一法。以不捨離清淨體故。偈言不相捨離。相不增減一法故。是故聖者勝鬘經言。世尊有二種如來藏。空智。世尊空如來藏。若離若脫。若異一切煩惱藏。世尊不空如來藏。過於恆沙。不離不脫。不異不思議佛法故。如是以何等煩惱。以何等處無如是如實見知名爲空智。又何等諸佛法。何處具足有如是如實見知名不空智。如是明離有無二邊。如實知空相。此二偈中。明如是義。又眾生若離如是空智。彼人則是佛境界。外名不相

應不得定不得一心以是義故名散亂心失空眾生何以故以離第一義空智門無分別境界不可得證不可得見是故聖者勝鬘經言世尊如來藏智名爲空智世尊如來藏空智者一切聲聞辟支佛等本所不見本所不得本所不證本所不會世尊一切苦滅唯佛得證壞一切煩惱藏修一切滅苦道故如是此如來藏以法界藏故身見等眾生不能得見已說以身見相對治眞實法界未現前故又如如是出世間法身如來藏非顛倒眾生境界已說以無常等世間法對治出世間法界未現前

故。又如。是自性清淨法界。如來空藏。非散亂心。失空眾生境界。已說以煩惱垢客塵染空。自性清淨功德法。不相捨離。出世間法身得名故。此明何義。又依一味等味法界。無差別智門。觀察出世間自性清淨法身。是名如實知見真如。是故經說。十住菩薩。唯能少分見如來藏。何況凡夫二乘人等。是故偈言。

譬如薄雲中

見虛空有日

淨慧諸聖人

見佛亦如是。

聲聞辟支佛

如無眼目者

不能觀如來

如盲不見日。

所知一切法

有無量無邊 徧虛空法界 無量智能見。
諸如來法身 充滿一切處 佛智慧能見
以無量智故。

爲何義說品第七

問曰。眞如佛性如來藏義住無障礙究竟菩薩地
菩薩第一聖人亦非境界以是一切智者境界故。
若如是者何故乃爲愚癡顛倒凡夫人說答曰。以
是義故略說四偈。

處處經中說 內外一切空 有爲法如雲
及如夢幻等。 此中何故說 一切諸眾生

皆有如來性

而不說空寂

以有怯弱心

輕慢諸眾生

執著虛妄法

謗真如實性

計身有神我

爲令如是等

遠離五種過

故說有佛性。

此四行偈以十一偈略釋應知。偈言

諸脩多羅中

說有爲諸法

謂煩惱業等

如雲等虛妄

煩惱猶如雲

所作業如夢

如幻陰亦爾

煩惱業生故

先已如是說

此究竟論中

爲離五種過

說有真如性

以眾生不聞

不發菩提心

或有怯弱心

欺自身諸過 未發菩提心 生起欺慢意
見發菩提心 我勝彼菩薩 如是憍慢人
不起正智心 是故虛妄取 不知如實法
妄取眾生過 不知客染心 實無彼諸過
自性淨功德 以取虛妄過 不知實功德
是故不得生 自他平等慈 聞彼眞如性
起大勇猛力 及恭敬世尊 智慧及大悲
生增長五法 不退轉平等 無一切諸過
唯有諸功德 取一切眾生 如我身無異
速疾得成就 無上佛菩提。

究竟一乘寶性論卷第五

究竟一乘寶性論卷第六

後魏中印度三藏勒那摩提譯

身轉清淨成菩提品第八

論曰。已說有垢。如自此以下說無垢。如應知無垢。如者謂諸佛如來於無漏法界中遠離一切種種諸垢。轉雜穢身得淨妙身。依八句義略差別說。彼眞如性無漏法身應知何等爲八。偈言。

淨得及遠離。自他利相應。依止深快大。

時數如彼法。

是名八種句義次第。一偈示現八種義者。何謂八

種一者實體二者因三者果四者業五者相應六者行七者常八者不可思議實體者向說如來藏不離煩惱藏所纏以遠離諸煩惱轉身得清淨是名爲實體應知偈言淨故是故聖者勝鬘經言世尊若於無量煩惱藏所纏如來藏不疑惑者於出無量煩惱藏法身亦無疑惑故因者有二種無分別智一者出世間無分別智二者依出世間智得世間依止行智是名爲因偈言得故果者卽依此得得證智果是名爲果偈言遠離故業者有二種遠離一者遠離煩惱障二者遠離智障如是次第

故名遠離如是遠離自利利他成就是名爲業。偈言自他利故相應者自利利他得無量功德常畢竟住持是名相應。偈言相應故行常不思議者謂三種佛法身無始世界來作眾生利益常不休息不可思議。偈言依止深快大故以是義故略說偈言。

實體因果業。及以相應行。常不可思議。
名佛地應知。

又依實體依因於佛地中及得彼方便因故說三偈。

向說佛法身

自性清淨體

爲諸煩惱垢

客塵所染污

譬如虛空中

離垢淨日月

爲彼厚密雲

羅網之所覆

佛功德無垢

常恆及不變

不分別諸法

得無漏眞智

此三行偈以四行偈略釋應知偈言

佛身不捨離

清淨眞妙法

如虛空日月

智離染不二

過恆沙佛法

明淨諸功德

非作法相應

不離彼實體

煩惱及智障

彼法實無體

常爲客塵染

是故說雲喻

遠離彼二因

向二無分別

無分別眞智

及依彼所得。

此偈明何義向說轉身實體清淨。又清淨者略有二種。何等爲二。一者自性清淨。二者離垢清淨。自性清淨者。謂性解脫無所捨離。以彼自性清淨。心體不捨一切客塵煩惱。以彼本來不相應故。離垢清淨者。謂得解脫。又彼解脫不離一切法。如水不離諸塵垢等而言清淨。以自性清淨。心遠離客塵諸煩惱垢更無餘故。

又依彼果離垢清淨故說四偈。

如清淨池水

無有諸塵濁

種種雜華樹

周币常圍遶。

如月離羅睺。

日無雲翳等。

無垢功德具。

顯現卽彼體。

蜂王美味蜜。

堅實淨真金。

寶藏大果樹。

無垢真金像。

轉輪聖王身。

妙寶如來像。

如是等諸法。

卽是如來身。

此四行偈以九行偈略釋應知偈言。

貪等客煩惱。

猶如濁水塵。

無分別上智。

果如法池水。

示現佛法身。

一切諸功德。

依彼證智果。

是故如是說。

貪如濁水塵。

淨法雜垢染。

可化諸眾生。

如繞池藕花。

禪定習氣潤 遠離瞋羅睺 以大慈悲水

徧益諸眾生 如十五日月 遠離雲羅網

光明照眾生 能除諸幽闇 佛無垢日月

離癡雲羅網 智光照眾生 除滅諸黑闇

得無等等法 能與妙法味 諸佛如蜜堅

遠離蜂蠅障 真實妙功德 除斷諸貧窮

能與解脫勢 故說金樹喻 法寶真實身

增上兩足尊 勝色畢竟成 故說後三喻

又向說以二種智依自利利他業何者爲二二者

出世間無分別智二者依出世間無分別智轉身

得身行因遠離煩惱得證智果故。又何者是成就
自利謂得解脫遠離煩惱障遠離智障得無障礙
清淨法身是名成就自身利益。又何者是成就他
利益既得成就自身利已無始世來自然依彼二
種佛身示現世間自在力行是名成就他身利益。
又依自利利他成就業義故說四偈

無漏及徧至 不滅法與恆 清涼不變異

不退寂靜處 諸佛如來身 如虛空無相

爲諸勝智者 作六根境界 示現微妙色

出於妙音聲 令嗅佛戒香 與佛妙法味。

使覺三昧觸

令知深妙法

細思惟稠林

佛離虛空相。

此四行偈以八行偈略釋應知偈言。

略說二種法

業智應當知

滿足解脫身

清淨真法身。

解脫身法身

二及一應知

謂無漏徧至

及究竟無爲

煩惱盡無漏

及習氣滅故

無礙及無障

智徧至應知。

無爲故不滅

實體不失故

不失名爲本

恆等句解釋

對於恆等句

有四失應知

死無常及轉

不可思議退。

以無死故恆

以常故清涼 不轉故不變 寂靜故不退。

彼究竟足跡 淨智白法體 具足色聲等

示現於諸根。 如虛空無相 而現色等相

法身亦如是 具六根境界。

此偈明何義。經中說言如虛空相。諸佛亦爾者。此依第一義。諸佛如來清淨法身自體相不共法。故作如是說。以是義故。金剛般若波羅蜜經言。須菩提。於意云何。可以三十二大人相成就得見如來。不須菩提言。如我解佛所說義者。不以相成就得見如來。佛言。如是如是。須菩提。不以相成就得見。

如來須菩提若以相成就觀如來者轉輪聖王應是如來是故非以相成就得見如來故此明何義以依如來第一義諦清淨法身明如是義。

又依相應義故說二偈。

如空不思議

常恆及清涼

不變與寂靜

徧離諸分別

一切處不著

離礙麤澀觸

亦不可見取

佛淨心無垢。

此二行偈以八行偈略釋應知偈言。

解脫身法身

亦自利利他

依自利利他

彼處相應義

一切諸功德

不思議應知

以非三慧境 一切種智知 諸眾生佛體

細故非聞境 第一非思慧 以出世深密

世修慧不知 諸愚癡凡夫 本來未曾見

如盲不矚色 二乘如嬰兒 不見日月輪

以不生故常 以不滅故恆 離二故清涼

法性住不變 證滅故寂靜 一切覺故徧

不住無分別 離煩惱不著 無智障離礙

柔軟離麤澀 無色不可見 離相不可取

以自性故淨 離染故無垢

此偈明何義虛空譬喻者明諸佛如來無爲諸功

德不離佛法身。於所有諸有得不可思議勝大方
便業勝大悲業勝大智業爲與一切眾生樂相無
垢清淨三種佛身所謂實佛受法樂佛及化身佛
常不休息常不斷絕自然修行以爲利益一切眾
生應知。以不共餘人唯諸佛如來法身相應故。
此明何義。以依此身相應諸行差別故說八偈。

非初非中後

不破壞不二

遠離於三界

無垢無分別

此甚深境界

非二乘所知

具勝三昧慧

如是人能見

出過於恆沙

不思議功德

唯如來成就

不與餘人共

如來妙色身

清淨無垢體

遠離諸煩惱

及一切習氣

種種深妙法

光明以爲體

令眾生解脫

常無有休息

所作不思議

如摩尼寶王

能現種種形

而彼體非實

爲世間說法

示現寂靜處

教化使淳熟

授記令入道

如來鏡像身

而不離本體

猶如一切色

不離於虛空

此八行偈以二十五偈略釋應知。偈言。

向說佛法身

及一切種智

自在與涅槃

及第一義諦

不可思議法

應供等功德

唯自身內證	應當如是知	彼三身差別
實法報化等	所謂深快大	無量功德身
明實體身者	謂諸佛法身	略說五種相
五功德應知	無爲無差別	遠離於二邊
出離煩惱障	智障三昧障	以離一切垢
故聖人境界	清淨光明照	以法性如是
無量阿僧祇	不可數思議	無等諸功德
到第一彼岸	實法身相應	以快不可數
非思量境界	及遠離習氣	無邊等佛法
次第不離報	受種種法味	示現諸妙色

淨慈悲習氣 無虛妄分別 利益諸眾生

自然無休息 如如意寶珠 滿足眾生心

受樂佛如是 神通力自在 此神力自在

略說有五種 說法及可見 諸業不休息

及休息隱沒 示現不實體 是名要略說

有五種自在 如摩尼寶珠 依種種諸色

異本生諸相 一切皆不實 如來亦如是

方便力示現 從兜率陀退 次第入胎生

習學諸伎藝 嬰兒入王宮 厭離諸欲相

出家行苦行 推問諸外道 往詣於道場

降伏諸魔眾 成大妙覺尊 轉無上法輪
入無餘涅槃 於不清淨國 現如是等事
世閒無休息 宣說無常苦 無我寂靜名
方便智慧力 令彼諸眾生 厭離三界苦
後入於涅槃 以示寂靜道 諸聲聞人等
有是虛妄想 言我得涅槃 法華等諸經
皆說如實法 般若方便攝 迴先虛妄心
令淳熟上乘 授妙菩提記 微細大勢力
令愚癡眾生 過嶮難惡道 深快及以大
次第說應知 初法身如來 第二色身佛

譬如虛空中 有一切色身 於初佛身中

最後身亦爾。

自此以下卽依如是三種佛身爲樂眾生利益眾生略說二偈。

世尊體常住 以修無量因 眾生界不盡

慈悲心如意 智成就相應 法中得自在

降伏諸魔怨 體寂靜故常。

此二行偈以六行偈略釋應知偈言。

棄捨身命財 攝取諸佛法 爲利益眾生

究竟滿本願 得清淨佛身 起大慈悲心

修行四如意 依彼力住世 以成就妙智

離有涅槃心 常得心三昧 成就樂相應

常在於世間 不爲世法染 得淨甘露處

故離一切魔 諸佛本不生 本來寂靜故

以常可歸依 故言歸依我 初七種譬喻

如來色身常 後三種譬喻 善逝法身常

此偈明何義諸佛如來依法身轉得無上身不可

思議應知依不可思議故說二偈

非言語所說 第一義諦攝 離諸覺觀地

無譬喻可說 最上勝妙法 不取有涅槃

非三乘所知 唯是佛境界。

此二行偈以五行偈略釋應知。偈言。

不可得思議 以離言語相 離言語相者

以第一義攝 第一義攝者 非思量境界

非思量境者 以無譬喻知 無譬喻知者

以最勝無上 最勝無上者 不取有涅槃

不取是二者 不取功德過 前五種譬喻

微細不思議 如來法身常 第六譬喻者

以得自在故 如來色身常。

如來功德品第九

論曰已說無垢眞如法身次說依彼無垢眞如法
身一切功德如摩尼寶不離光明形色諸相如來
法身無量無邊自性清淨無垢功德亦復如是以
是義故依佛功德次說二偈

自利亦利他

第一義諦身

依彼眞諦身

有此世諦體

果遠離淳熟

此中具足有

六十四種法

諸功德差別

此偈示現何義偈言

於自身成就

住持諸佛法

故攝第一身

爲他身住持

諸如來世尊

故有世諦體

佛無量功德 初身攝應知 十力四無畏

大丈夫相等 彼受樂報體 第二佛身攝

此偈明何義明十力等六十四種佛身功德。此云何知。依彼義故略說二偈。

佛力金剛杵 破無智者障 如來無所畏

處眾如師子 如來不共法 清淨如虛空

如彼水中月 眾生二種見

自此已下功德品中餘殘論偈。依此二偈次第示現彼十力等六十四種如來功德。如陀羅尼自在王經廣說應知。初依十力故說二偈。

處非處果報

業及於諸根

性信至處道

離垢諸禪定

憶念過去世

天眼寂靜智

如是等諸句

說名十種力

又依四無畏故說三偈。

如實覺諸法

遮諸礙道障

說道得無漏

是四種無畏

於所知境界

畢竟知自他

自知教他知

此非遮障道

能證勝妙果

自得令他得

說自他利諦

是諸處無畏

又依十八不共佛法故說八偈

佛無過無諍

無妄念等失

無不定散心

無種種諸想

無作意護心

欲精進不退

念慧及解脫

知見等不退

諸業智爲本

知三世無障

佛十八功德

及餘不說者

佛身口無失

若他來破壞

內心無動相

非住心捨心

世尊欲精進

念淨智解脫

知見常不失

示現可知境

一切諸業等

智爲本展轉

三世無障礙

廣大智行常

是名如來體

大智慧相應

覺彼大菩提

最上勝妙法

爲一切眾生

轉於大法輪

無畏勝妙法

令彼得解脫

又依三十二大人相故說十二偈。

足下相平滿

具足千輻輪

跟臚趺上隆

伊尼鹿王蹲

手足悉柔輓

諸指皆纖長

鵝王網縵指

臂肘上下臚

兩肩前後平

左右俱圓滿

立能手過膝

馬王陰藏相

身臚相洪雅

如尼拘樹王

體相七處滿

上半如師子

威德勢堅固

猶如那羅延

身色新淨妙

柔輓金色皮

淨輓細平密

一孔一毛生

毛柔輓上靡

微細輪右旋

身淨光圓而

頂上相高顯

頂如孔雀王

頤方若師子。

髮淨金精色

喻如因陀羅

額上白毫相

通面淨光明。

口含四十齒

二牙白踰雪

深密內外明

上下齒平齊

迦陵頻伽聲

妙音深遠聲

所食至喉現

得味中上味。

細薄廣長舌

二目淳紺色

瞬眼若牛王

功德如蓮華。

如是說人尊

妙相三十二

一一不雜亂

普身不可嫌。

此佛十力四無所畏十八不共法三十二大人相

略集一處是名六十四種功德應知偈言。

六十四功德

修因及果報

一一各差別

寶經次第說。

此偈明何義。向說諸佛如來六十四種功德因果差別。依此次第寶女經中廣說應知。又復依此四處次第有四種喻。謂金剛杵及師子王虛空譬喻水中月等有九行偈。依彼九偈略說偈言。

衝過無慈心 不其他無心 故說杵師子
空水中月喻。

又依十力金剛杵喻故說二偈。

處非處業性

眾生諸信根

種種道修地

過宿命差別

天眼漏盡等

佛力金剛杵

能刺摧散斫 癡鎧山墻樹。

此偈示現何義略說偈言。

諸如來六力 次第三及一 所知境界中

離三昧諸障 及離餘垢障 譬如破散截

鎧墻及樹等 亦重亦堅固 亦不可破壞

如來十種力 猶如彼金剛 故說金剛杵。

又依四無畏師子王喻故說二偈。

譬如師子王 諸獸中自在 常處於山林

不怖畏諸獸。 佛人王亦爾 處於諸羣眾

不畏及善住 堅固奮迅等。

此偈示現何義略說偈言。

知病苦知因 遠離彼苦因 說聖道妙藥

爲離病證滅 遠離諸怖畏 善住奮迅城

佛王在大眾 無畏如師子 以知一切法

是故能善住 一切處不畏 離愚癡凡夫

二乘及清淨 以見我無等 於一切法中

心常定堅固 何故名奮迅 過無明住地

自在無礙處 是故名奮迅。

又依十八不共法虛空譬喻故說三偈。

地水火風等 彼法空中無 諸色中亦無

虛空無礙法。

諸佛無障礙。

猶如虛空相。

如來在世間。

如地水火風。

而諸佛如來。

所有諸功德。

乃至無一法。

其餘世間有。

此偈示現何義略說偈言。

聲聞及空行。

智者及自在。

上上微細法。

故示現五大。

諸眾生受用。

如地水火風。

離世離出世。

故說虛空大。

三十二功德。

依止法身有。

如世間燈炷。

明煖及色相。

相應無差別。

諸如來法身。

一切諸功德。

無差別亦爾。

又依三十二大丈夫相水中月喻故說二偈。

秋空無雲翳

月在天及水

一切世閒人

皆見月勢力。

清淨佛輪中

具功德勢力

佛子見如來

功德身亦爾。

此偈示現何義略說偈言。

三十二功德

見者生歡喜

依法報化身

三種佛而有。

法身淨無垢

遠離於世閒

在如來輪中

眾生見二處。

如清淨水中

見於月影像

是三十二相

依色身得名。

如摩尼寶珠

不離光色相

色身亦如是

不離三十二。

自然不休息佛業品第十

論曰已說無垢諸佛功德。次說諸佛如來作業。彼諸佛業自然而行。常不休息。教化眾生。應知。此依略說有二種法。自然而行。以是義故。依諸佛業。自然而行。常不休息。常作佛事故。說六偈。

於可化眾生

以教化方便

起化眾生業

教化眾生界

諸佛自在人

於可化眾生

常待處待時

自然作佛事

徧覺知大乘

最妙功德聚

如大海水寶

如來智亦爾

菩提廣無邊 猶如虛空界 放無量功德

大智慧日光 徧照諸眾生 有佛妙法身

無垢功德藏 如我身無異 煩惱障智障

雲霧羅網覆 諸佛慈悲風 吹令散滅盡

此六行偈義以十四偈略釋應知。偈言。

以何等性智 何者何處時 作業無分別

是故業自然 以何等根性 諸眾生可度

以何等智慧 能度諸眾生 又以何者是

化眾生方便 眾生以何處 何時中可化

進趣及功德 爲果爲攝取 彼障及斷障

諸緣不分別。進趣謂十地。功德因二諦。

果謂大菩提。攝菩薩眷屬。彼障謂無邊。

煩惱及習氣。斷障謂大慈。及大悲心等。

是名一切時。常種種因緣。如是等六處。

次第說應知。如大海水寶。空日地雲風。

諸地如大海。智水功德寶。菩提如空界。

廣無中後邊。爲利益眾生。二種業如日。

能悉徧照知。一切眾生界。皆有如來性。

如地中伏藏。猶如彼大地。體安固不動。

爲利益眾生。見彼我無別。客塵煩惱等。

本自無體性 一切皆虛妄 如雲聚不實
起大慈悲心 猶如猛風吹 煩惱智障盡
如彼雲聚散 化事未究竟 故常在世間
從本際以來 自然不休息。

問曰。如向所說諸佛如來不生不滅。若如是者。卽無爲法。無爲法者。不修行業。云何自然不休息。常教化眾生事。答曰。爲示現彼諸佛大事。斷諸疑惑。是故依彼不可思議無垢清淨諸佛境界。示現大事故。以譬喻說一行偈。

帝釋妙鼓雲

梵天日摩尼

響及虛空地

如來身亦爾。

依此一行脩多羅攝取義偈九種譬喻自此以下
廣說餘殘六十六偈應知。又復依彼廣說偈義九
種譬喻略說彼義。及以次第廣說如來無上利益
一切眾生修行究竟。以十九偈解釋應知。偈言。

遠離一切業 未曾見有果 為一切疑人

除諸疑網故。 說九種譬喻 彼脩多羅名

廣說此諸法 彼脩多羅中。 廣說九種喻

彼名智境界 快妙智莊嚴 有智者速入。

具足佛境界 說彼天帝釋 琉璃鏡像等

九種諸譬喻。

應知彼要義。

見說及徧至。

以離諸相智。

身口意業密。

大慈悲者得。

離諸功用心。

無分別寂靜。

以智故無垢。

如大毗琉璃。

帝釋等譬喻。

智究竟滿足。

故究竟寂靜。

以有淨智慧。

是故無分別。

爲成種種義。

故說釋等喻。

爲成彼義者。

說九種見等。

離生離神通。

諸佛現是事。

是名爲略說。

種種義譬喻。

先喻解異後。

後喻解異前。

佛體如鏡像。

如彼琉璃地。

人非不有聲。

如天妙法鼓。

非不作法事。

如彼大雲雨 非不作利益 而亦非不生

種種諸種子 如梵天不動 而非不淳熟

如彼大日輪 非不破諸闇 如彼如意寶

而非不希有 猶如彼聲響 非不因緣成

猶如彼虛空 非不爲一切 眾生作依止

猶如彼大地 而非不住持 一切種種物

以依彼大地 荷負諸世間 種種諸物故

依諸佛菩提 出世間妙法 成就諸白業

諸禪四無量 及以四空定 諸如來自然

常住諸世間 有如是諸業 一時非前後

作如是妙業。

校量信功德品第十一

論曰。向說四種法。自此已下。明有慧人於彼法中。能生信心。依彼信者所得功德。說十四偈。

佛性佛菩提

佛法及佛業

諸出世淨人

所不能思議。

此諸佛境界

若有能信者

得無量功德

勝一切眾生。

以求佛菩提

不思議果報

得無量功德

故勝諸世間。

若有人能捨

摩尼諸珍寶

徧布十方界

無量佛國土。

爲求佛菩提

施與諸法王

是人如是施 無量恆沙劫 若復有人聞

妙境界一句 聞已復能信 過施福無量

若有智慧人 奉持無上戒 身口意業淨

自然常護持 為求佛菩提 如是無量劫

是人所得福 不可得思議 若復有人聞

妙境界一句 聞已復能信 過戒福無量

若人入禪定 焚三界煩惱 過天行彼岸

無菩提方便 若復有人聞 妙境界一句

聞已復能信 過禪福無量 無慧人能捨

唯得富貴報 修持禁戒者 得生天人中

修行斷諸障 非慧不能除 慧除煩惱障
亦能除智障 聞法爲慧因 是故聞法勝
何況聞法已 復能生信心。

此十四偈以十一偈略釋應知偈言。

身及彼所轉 功德及成義 示此四種法
唯如來境界 智者信爲有 及信畢竟得
以信諸功德 速證無上道 究竟到彼岸
如來所住處 信有彼境界 彼非可思議
我等可得彼 彼功德如是 唯深信勝智
欲精進念定 修智等功德 無上菩提心

一切常現前。以常現前故。名不退佛子。

彼岸淨功德。畢竟能成就。五度是功德。

以不分別三。畢竟及清淨。以離對治法。

施唯施功德。持戒唯持戒。餘二度修行。

謂忍辱禪定。精進徧諸處。慳等所治法。

名爲煩惱障。虛分別三法。是名爲智障。

遠離彼諸障。更無餘勝因。唯眞妙智慧。

是故般若勝。彼智慧根本。所謂聞慧是。

以聞慧生智。是故聞爲勝。

又自此已下。明向所說義。依何等法說。依何等義。

說依何等相說。初依彼法故說二偈。

我此所說法

爲自心清淨

依諸如來教

脩多羅相應。

若有智慧人

聞能信受者

我此所說法

亦爲攝彼人。

自此已下次依彼義故說二偈。

依鐙電摩尼

日月等諸明

一切有眼者

皆能見境界。

依佛法光明

慧眼者能見

以法有是利

故我說此法

自此已下次依彼相故說二偈。

若一切所說

有義有法句

能令修行者

遠離於三界 及示寂靜法 最勝無上道

佛說是正經 餘者顛倒說。

自此已下依護法方便故說七偈

雖說法句義 斷三界煩惱 無明覆慧眼

貪等垢所纏 又於佛法中 取少分說者

世典善言說 彼三尙可受 何況諸如來

遠離煩惱垢 無漏智慧人 所說脩多羅

以離於諸佛 一切世閒中 更無勝智慧

如實知法者 如來說了義 彼不可思議

思者是謗法 不識佛意故 謗聖及壞法

此諸邪思惟

煩惱愚癡人

妄見所計故

故不應執著

邪見諸垢法

以淨衣受色

垢膩不可染。

自此已下依謗正法故說三偈

愚不信白法

邪見及憍慢

過去謗法障

執著不了義

著供養恭敬

唯見於邪法

遠離善知識

親近謗法者

樂著小乘法

如是等眾生

不信於大乘

故謗諸佛法。

自此已下依謗正法得惡果報故說六偈。

智者不應畏

怨家蛇火毒

因陀羅霹靂

刀杖諸惡獸。

師子虎狼等。

彼但能斷命。

不能令人入。

可畏阿鼻獄。

應畏謗深法。

及謗法知識。

決定令人入。

可畏阿鼻獄。

雖近惡知識。

惡心出佛血。

及殺害父母。

斷諸聖人命。

破壞和合僧。

及斷諸善根。

以繫念正法。

能解脫彼處。

若復有餘人。

誹謗甚深法。

彼人無量劫。

不可得解脫。

自此已下依於說法師生敬重心故說二偈。

若人令眾生。

學信如是法。

彼是我父母。

亦是善知識。

彼人是智者。

以如來滅後。

迴邪見顛倒 令入正道故。

自此已下依彼說法所得功德以用迴向故說三偈。

三寶清淨性 菩提功德業 我略說七種

與佛經相應 依此諸功德 願於命終時

見無量壽佛 無邊功德身 我及餘信者

既見彼佛已 願得離垢眼 成無上菩提。

自此已下略說句義偈言。

依何等法說 依何等義說 依何等相說

如彼法而說 如彼義而說 如彼相而說

彼一切諸法 六行偈示現 護自身方便

以七行偈說 明誹謗正法 故有三行偈

六偈示彼因 以二偈示現 於彼說法人

深生敬重心 大眾聞忍受 得彼大菩提

略說三種法 示現彼果報。

究竟一乘寶性論卷第六

刻寶性論六卷連圈計字四萬三千五百六十五
個由願款支給工費銀元一百七元二角八分八
釐

民國八年冬十月

金陵刻經處識

寶性論

功德主名錄

委印文號：107174

三一、〇〇〇元：莊晏甄(迴向本人及其累世父母、累劫冤家債主、六親眷屬諸障消除，生生世世到有正法地方學佛，早日成佛；並迴向本人身體健康，事業順利，身口意清淨，勤修戒定慧，息滅貪瞋癡慢疑、身見、邊見、見取見、邪見、見禁取見。)

以上共計新台幣：三一、〇〇〇元，恭印一、〇〇〇本。

回向：天下和順，日月清明，風雨以時，災厲不起，國豐民安，兵戈無用，

崇德興仁，務修禮讓，國無盜賊，無有怨枉，強不凌弱，各得其所。

祝願法界一切有情，所有六道四生，宿世冤親，現世業債，咸憑法力，悉得解脫。

祝願現生者增福延壽，發菩提心，常隨佛學，勤修精進，利濟群生。

祝願已故者往生淨土，同出苦輪，共登覺岸。

附記：本會接受善信委託，代印經書、佛像，其必要之費用，均經本會審慎評估；若有結餘，均續作本會之印(購)經書及運費，為施主廣積陰德，歡迎十方大德善加利用。

普為出資及讀誦受持
輾轉流通者回向偈曰

願以此功德
消除宿現業
增長諸福慧
圓成勝善根
所有刀兵劫
及與饑饉等
悉皆盡滅除
人各習禮讓
讀誦受持人
輾轉流通者
現眷咸安樂
先亡獲超昇
風雨常調順
人民悉康寧
法界諸含識
同證無上道

佛曆二五六二年／西元二〇一八年五月

恭印：一〇〇〇本

流水號：15863
書號：CH4-1-01

寶性論

發行人：簡豐文

出版者：財團法人佛陀教育基金會

地址：100 台北市杭州南路一段五十五號十一樓

網址：www.budaedu.org

E-mail: budaedu@budaedu.org

電話：(〇二)三三九五一一一九八 傳真：(〇二)三三九一—三四一五

劃撥戶名：財團法人佛陀教育基金會 郵局劃撥帳號：〇七六九九九七九

銀行名稱：台灣銀行城中分行（請於電匯或轉帳後告知本會用途）

銀行帳號：〇四五〇〇四五九七五〇三

本會經書免費結緣之請取方式如下：

(一)親臨本會二樓講堂。(二)利用傳真：(02) 23965959

(三)撥打電話：(02) 23961198 分機：11 / 12

(四)網址：<http://www.budaedu.org/books/>。(五)寫信指定：本會法寶流通股。

為提高服務效率，請您嚴謹考量，慎選所需經書；儘量少用電話，多利用文字方式請取，並請詳寫經書名稱、冊數及收件人姓名、地址、電話、郵遞區號，以減少本會之處理時間；若大量申請，請註明用途，且避免姓名、地址等文字上書寫之錯誤。

◎本會經書，歡迎翻印（請勿增刪），贈送流通，功德無量。

◎本會交通：

※捷運：善導寺站5號出口，至杭州南路右轉，過兩個紅綠燈。

※公車站牌：審計部站→212、299、232、205、276、605、257、262

台北商業技術學院→253、297、237 仁愛路二段→253、297 開南商工→208

仁愛路、杭州南路（紹興街）口→630、270、263、245、621、651、37、261

行政院新聞局出版事業登記證局版臺業字第三八六九號



